

প্রথম প্রকাশ : সেপ্টেম্বর ১৯৫৪

প্রকাশক : সুরেশা পোদ্দার

বিচিত্রা, ৭৪ মহাত্মা গান্ধী রোড, কলকাতা ৭০০ ০০৯

মুদ্রাকর : রণেন্দ্রনাথ বন্দ্যোপাধ্যায়

নিউ টাইমস্ প্রিন্টার্স, ২০৬ বিধান সরণি, কলকাতা-৭০০ ০০৬

প্রচ্ছদ : গৌতম রায়

পরিবেশক : আশা প্রকাশনী, ৭৪ মহাত্মা গান্ধী রোড,

কলকাতা ৭০০ ০০৯

## সূচীপত্র


বুদ্ধির ধাঁধা	ধাঁধা	উত্তর
1. নিম-এর খেলা	9	80
2. ঘোড়ার সঙ্গে ঘোরাঘুরি	11	81
3. জালিয়াতির জালা	12	81
4. বইএর পোকা	13	82
5. নামাবলি	14	82
6. ছেলের হাতের মোয়া	14	82
7. কয়েদীর কেরামতি	15	82
8. সত্যাসত্য	16	82
9. শহীদ মন্দির	17	83
10. ছোট্টো কিন্তু বড়ো সমস্যা	18	83
11. তুরুপের রং	19	83
12. গয়লার কেরামতি	19	84
13. ভাই-ভাই	20	84
14. ঝিঁঝিপোকাকার কান্না	21	85
15. বাঘা দাবাড়ের কাণ্ড	22	86
16. দুধে-জলে	22	86
17. প্রচ্ছন্ন পাঁচিগণিত	23	86
18. বন্দী পতঙ্গ	24	86
19. ঘনরাম দাসের দিনপঞ্জি থেকে	25	87
20. আপত্তিকর চিঠিচাপাটি	26	87
21. বাউপাড়িয়া হত্যারহস্য	30	87
দংক-র ধাঁধা		
22. যাদুঘর্ষ ও বিযাদুঘর্ষ	34	88
23. পায়ে ধরে সাধা	35	89
24. দস্তুরমতো দরদস্তুর	36	90
25. খলট অ্যাভিনিউ-এর ডাকপিয়ন	37	90

	ধাঁধা	উদ্ভব
26. দুঃসাহসিক ভ্রমণকাহিনী	39	91
27. জন্মদিনের কেক	40	91
28. হবুচন্দ্র রাজার গোলটেবিল	41	92
29. বিভাজ্যতা	42	92
30. উড়নচণ্ডীতলা হাউসিং এস্টেট	44	93
31. বাজাব করার হাজার ঠালা	45	93
32. টোপোলজি	46	94
33. পৃথিবীর সূত্রবলয়	49	94
34. নোস্টার বুদ্ধি	49	94
35. হ য ব ল-র বিচার সভা	50	94
36. স্বল্পতম দূরত্ব	51	94
37. পাঁচে বহুতল ছায়ে গ্রহ	51	95
38. কাটাকুটি	55	96
খেল।		
39. বাসাবদল	57	96
40. একটি খুচরো সমস্যা	58	97
41. ঘড়ি ভাগ	59	97
42. ছাখার ভুল	59	97
43. রাজাব খেলা দাবা	61	98
44. টোপোলজির খেলা	63	98
45. তাসেব দেশ	63	99
46. ব্রহ্মগুপ্তের সমস্যা	65	99
47. ঘরে-বাইবে	65	99
48. হাতি-গলা ফাঁক	66	99
49. লীলাময়বাবুর লীলাখেলা	66	100
50. ভূতুড়ে গের্ট	68	100
51. সাংখ্যদর্শন	69	100
52. ধাঁধালি	75	102

## 1. নিম-এর খেলা

দুজনে মিলে ঘরে বসে যত রকম খেলা খেলা যায়, তার মধ্যে সবচেয়ে চালু হলো কার্টাকুটি। কিন্তু একটু বড়ো হলেই খেলাটার মজা চলে যায়। একেবারে অস্বমনস্ক না-হলে প্রত্যেকবারই ড্র হবে। কিন্তু নিম-এর খেলার (NIM GAME) ব্যাপারই আলাদা। অনেকে বড়ো বয়েস পর্যন্ত হেরেই চলে, কী করে জেতে কিছুতেই বুঝে উঠতে পারেন না। আর কিছু ছেলে খেলাটা শেখার পরেই একটু মাথা খাটিয়ে ব্যাপারটা বুঝে নেয়, ফলে শুধুই জিতে চলে।

নিম-এর খেলা বোধহয় প্রথম চালু হয়েছিল চীনে। খেলাটার নাম 'নিম' দিয়েছিলেন হার্ভার্ড বিশ্ববিদ্যালয়ের অংক-র অধ্যাপক চার্লস লিওনার্ড বুটন। 1901 সালে তিনিই খেলাটা বিশ্লেষণ করেন। পুরনো ইংরেজিতে 'নিম' মানে সরিয়ে নেয়া বা হান্ধা।



করা। শেক্সপিয়ার-এর 'দ্য মেরি ওআইভ্‌স্ অব উইনসর' নাটকে  
ধাঁধা—২

নিম বলে একটি চরিত্র আছে। ভদ্রলোকের আবার একটু হাতটান ছিল। জার্মান ভাষায় *nehme eins*, মানে একটা নাও। আর কাগজটা ঘুরিয়ে পড়লে NIM শব্দটা ছাখাবে WIN, কারণ M-কে  $180^\circ$  ঘোরালে W হয়ে যায়, I আর N-এর চেহারা একটুও পালটায় না।

অনেক গৌরচন্দ্রিকা হলো। এবার খেলাটায় আসা যাক। ধরা যাক দুর্ধোধন আর যুধিষ্ঠির নিম খেলতে বসেছেন। তিন সারি দেশলাই কাঠি সাজিয়ে রাখা আছে। প্রথমটায় 3টে, দ্বিতীয়টায় 5টা, তৃতীয়টায় 7টা। একবার যুধিষ্ঠির একবার দুর্ধোধন এক-একটি সারি থেকে যে-ক-টা ইচ্ছে কাঠি টানবেন, এমনকি পুরো একটা সারিও টানতে পারেন। তবে একই সঙ্গে দুটো সারি থেকে কাঠি টানা চলবে না। দুজনের টানাটানিতে শেষ অবধি যে-কোনো সারির একটা মাত্র কাঠি পড়ে থাকবে। যিনি শেষ কাঠিটি টানতে বাধ্য হবেন, তাঁর হার।

যুধিষ্ঠিরই প্রথম টানবেন। তিনি প্রথম সারির একটা কাঠি নিলেন। দুর্ধোধন হেসে ঐ সারিরই বাকি দুটো কাঠি টেনে নিলেন। যুধিষ্ঠির ভুরু কুঁচকে তৃতীয় সারির তিনটে কাঠি নিলেন। দুর্ধোধন ঐ সারিরই একটা কাঠি টানলেন। যুধিষ্ঠির দ্বিতীয় সারির পাঁচটা কাঠিই তুলে নিলেন। দুর্ধোধন এক গাল হেসে বললেন, সত্যি দাদা, তোমার মতো লোক হয় না। বলে তিনটে কাঠির দুটো তুলে নিলেন। একটা পড়ে রইল যুধিষ্ঠিরের জন্তে। অতএব তাঁর হার।

বলে রাখা ভালো, দুজনেই পুরো আন্দাজে খেলেছেন। কারুরই কোনো 'প্লান' ছিল না। কিন্তু, বুদ্ধিমান পাঠক ভেবে-চিন্তে ছাখো তো, কার জেতার সম্ভাবনা বেশি : যে প্রথমে টানবে, না যে তার পরে টানবে। দ্বিতীয় কথা, প্রথমবার কোন্ সারি থেকে ক-টা কাঠি টানলে প্রথম খেলোয়াড় জিতবেই ?

## 2. ঘোড়ার সঙ্গে ঘোরাঘুরি

॥ ক ॥

পক্ষীরাজটার ক-দিন হলো পেটব্যথা। রাজপুত্র বাধ্য হয়েই এমনি ঘোড়ায় চড়লেন। অনেক দূর যেতে হবে—তেপাস্তুরের মাঠ পেরিয়ে আরো অনেকটা।

রাজপুত্র চলেছেন, চলেছেন, চলেছেন। হঠাৎ পেছন থেকে এক ঝলক গরম হাওয়া ঘাড়ে লাগলো। পেছনে তাকিয়ে তাকেন—সর্বনাশ! ঝাঁ ঝাঁ রোদ্দুরে এমনিই মাথা গরম হয়ে গেলো, এখন চোখ দুটো সকেট থেকে বেরিয়ে আসার জোগাড়। পেছনের সমস্ত ঘাসে আগুন ধরে গ্যাচে, প্রায় বেড়াজাল দিয়ে রাজপুত্রকে গ্রাস করতে আসচে। ঘোড়া যদি ঘণ্টায় ষাট মাইল জোরে যায়, হাওয়া বইচে সস্তর মাইল বেগে। যত জোরেই ঘোড়া ছোটোও, নিস্তার নেই। এতো আর পক্ষীরাজ নয় যে উড়ে যাবে। রাজপুত্র এধার-ওধার দেখে ঘোড়াটাকে দাঁড় করালেন—

শেষ পর্যন্ত রাজপুত্র দিব্য তেপাস্তুর পেরোলেন। কী করে ?

॥ খ ॥

রাজা কৃষ্ণচন্দ্র মরার সময় মন্ত্রীকে বলে গেলেন, আমি মরলে বড়ো ছেলেই রাজা হবে। তবে আমার সমস্ত সম্পত্তি ভাগ হবে এই ভাবে: বড়ো রাজপুত্র পাবে  $\frac{1}{2}$ , মেজো পাবে  $\frac{1}{3}$  আর ছোটো  $\frac{1}{6}$ ।

আর সব ঠিকঠাক হলো, শুধু সমস্যা হলো আস্তাবল নিয়ে। সতেরোটা ঘোড়া, তার  $\frac{1}{2}$ ,  $\frac{1}{3}$ ,  $\frac{1}{6}$  হবে কী করে? মহা মুশকিল। মন্ত্রী তো মাথা চুলকে অস্থির, তিন রাজপুত্রেরও তথৈবচ। ডাকো গোপাল ভাঁড়কে, যদি একটা মুশকিল আসান করতে পারে।

গোপাল ভাঁড় এক টাট্টু ঘোড়ায় চড়ে হাজির। সবাই বলে, কি হে গোপাল, তোমার আবার ঘোড়া কেন? কান এঁটো করে

হেসে গোপাল বললো, ঘোড়া ভাগাভাগির ব্যাপার, ঘোড়ায় না চড়লে চলে ?

দিব্যি ভাগাভাগি হলো। সবাই খুশি। কী করে ?

## ॥ গ ॥

এ এক অভূত স্বয়ম্বর। রাজকন্যা কি পণ করেছেন সবচেয়ে আনাড়ি লোককে মালা দেবেন ! হলুতুলু কাণ্ড।

রাজকন্যার দুটি ঘোড়া আছে। একটা কপ্পুরের মতো সাদা, অন্যটা শ্রাবণের মেঘের মতো কালো। যাঁরা স্বয়ম্বরায় আসবেন, তাঁদের মধ্যে থেকে দুজনকে বেছে নেয়া হবে। তার পরেই আসল পরীক্ষা। দুজনকে দুটি ঘোড়ায় উঠে ঐ দূরের নর্মদা নদীর জল আনতে হবে। যে-ঘোড়া শেষে পৌঁছবে তার জিৎ !

অঙ্গ আর কলিঙ্গের দুই রাজপুত্রই ছাখা গেলো ভাগ্যবান। রাজকন্যা তাদেরই বেছে নিলেন। দুই রাজপুত্র ছুটলো ঘোড়ায় চড়ে। অঙ্গ সাদায়, কলিঙ্গ কালোয়। নর্মদার জল নিয়ে দুজনেই দাঁড়িয়ে পড়লো। অঙ্গ দাঁত খিঁচিয়ে বললো, যা-না, দাঁড়িয়ে আছি কেন ? কলিঙ্গ বললো, আহা, তুই আগে যা।

এক সন্ন্যাসী দূরে বসে সমস্ত ঘটনাটা দেখছিলেন। এবার কাছে গিয়ে জিগেস করলেন ব্যাপারটা কী। ঘোঁৎঘোৎ করে দুজনেই বললো। সন্ন্যাসী দুজনেরই কানে কানে কী যেন বললেন। ব্যস, ছুট ছুট। দুজনেই প্রাণপণে ঘোড়া ছোটালো।

অঙ্গই জিতলো। কী করে ?

## 3. জালিয়াতির জ্বালা

কোট-প্যান্ট পরা এক ভদ্রলোক এলেন সাবিত্রী বস্ত্রালয়ে। চল্লিশ বাগ্গিল কাপড় দেখে একটা শাড়ি পছন্দ হলো। তারপর গুরু

হলো দর কষাকষি। শেষ অবধি তিরিশ টাকায় রফা হলো। অত কমে রফা করতে দোকানীর ইচ্ছে ছিল না। কিন্তু বউনি বলে কথা।

ভদ্রলোক একটা একশ টাকার নোট দিলেন। সাবিত্রী বজ্রালয়ে অত টাকার ভাঙানি ছিল না। দোকানী পাশের এক দোকান থেকে দশটাকার নোট এনে সমস্ত টাকা ফেরৎ দিলেন। ভদ্রলোকও টাকাটা যত্ন করে কোটের ভেতরের পকেটে পুরে, শাড়িটি নিয়ে চলে গেলেন।

ঘণ্টাখানেক বাদে পাশের দোকানী এসে বলেন কিনা ঐ একশ টাকার নোটটা জাল! সাবিত্রী বজ্রালয়ের তো মাথায় হাত। কী আর করবেন, নোটটা উলটেপালটে দেখে একশ টাকা ফেরৎ দিতে হলো।

সাবিত্রী বজ্রালয়ের তাহলে কত টাকা ক্ষতি হলো?

#### 4. বইএর পোকা

সব জায়গায় যা হয়, মরণচাঁদ স্মৃতি পাঠাগারেও তাই হয়েছে। ভালো লেখকের ভারি বই বাজারে কাটে না, পোকায় কাটে। শ্রীশ্রীশচন্দ্র তর্কচূড়ুর দশ খণ্ডের বই ‘মানবাত্মা ও জীবদেহের অগ্নোত্তম সম্পর্ক বিষয়ে গোস্বামীর সহিত বিচার’, প্রতি খণ্ডে পাঁচশ করে পাতা। দশটা খণ্ডই পরপর সাজানো পড়ে ছিল, কেউ কখনো পড়ে নি। হঠাৎ কোন্‌ গবেষকের দরকার পড়েছে। তাক থেকে দেগুলো নাবিয়ে ছাথে—সর্বনাশ! লেপিসুমা বলে সেই খানদানি পোকা প্রথম খণ্ডের প্রথম পাতা থেকে শেষ খণ্ডের শেষ পাতা পর্যন্ত সোজা কেটে চলে গ্যাছে।

কথা হলো, ঐ দশ খণ্ডের মোট কত পাতা পোকার খোঁরাক হয়েছে? ( মলাট বা মলাট খুললেই যে পুস্তকটির সাদা পাতা থাকে, সে-সব হিসেব থেকে বাদ )



## 5. নামাবলি

ধাঁধা ব্যাপারটা বোধহয় সংক্রামক। না হলে আমাদের পাড়ার জাঁদরেল হেডমিস্ট্রেস, যাঁর গলা শুনলে মুলতানি গরু ছুধের বদলে দই দেয়, তিনিও কিনা আমাদের সঙ্গে ধাঁধা করতে শুরু করেন! সেদিন আমাদের দপ্তরে বসে বললেন : জানোই তো, ইস্কুল-কলেজের বন্ধুদের সঙ্গে এখন আর বড়ো একটা ঝাঝা-ঢ্যাঝা হয় না। কুস্ত-কোণমের রাস্তায় হঠাৎ একজনকে দেখতে পেলুম, স্কটিশে আমার সঙ্গে পড়তো। সঙ্গে দেখি একটি বাচ্চা ছেলে। প্রায় এক যুগ বাদে ঝাঝা। অ্যাঁদন বেঁচে ছিল তাই জানতুম না। তা জিগেস করলুম, ছেলেটি কার। বললো, ওরই ছেলে, এবার নাকি ইস্কুলে ভর্তি হবে। ছেলেটিকে জিগেস করলুম, এই, তোর নাম কী রে? তো লাজুক গলায় বললো, বিত্তচঞ্চল রায়। আমি বললুম, বাঃ, বেশ বাবার নামের সঙ্গে মিলিয়ে নাম হয়েছে তো।

এই অবধি বলে, রক্ত-জল-করা গলায় হেডমিস্ট্রেস বললেন, বলো দিকি, কী করে নামের মিল ধরলুম।

## 6. ছেলের হাতের মোয়া

হাটে পাঠানোর আগে মা পইপই করে বলে দিলেন, এই ছ হাঁড়ি মোয়া দিলুম, একটা মোয়া দশ পয়সা, জোড়া বিশ পয়সা, পয়সা হাতে পেলে তবে মোয়া দিবি। কানাই বলাই ছই ভাই, কাঁধে ছ হাঁড়ি মোয়া নিয়ে বেরোলো। খানিক দূর যেতেই কানাই বললো, এই বলা, তোর হাঁড়ি থেকে একটা মোয়া দে-না। বলাই সাবধানী ছেলে। ঘাড় নেড়ে বললো, ওসব হবে না। ক্যালো কড়ি মাখো তেল।

হাটের পথে গজেনকাকুর সঙ্গে দ্যাখা। তিনি মোয়া-রসিক, নগদা পয়সা দিয়ে একটি মোয়া খেতে খেতে চলে গেলেন। হাটে

পৌছতে না পৌছতে ন্যায্য দামে সব মোয়া বিক্রি হয়ে গেলো। দিনের শেষে শুল্ক হাঁড়ি নিয়ে ছ ভাই বাড়ি ফিরলো।

মা খুশি হয়ে বললেন, লক্ষ্মী ছেলে, সব মোয়া বিক্রি হয়ে গ্যাচে? এবার হাত মুখ ধুয়ে দুটো মোয়া খা, তোদের জন্তেই তুলে রেখেছি। তারপর পয়সাকড়ি দে।

কানাই ট্যাক থেকে দশটি পয়সা বার করে দিলো। ব্যস, আর পয়সা ঠেকানোর নাম নেই। মা তো অবাক। কিন্তু দুই ভাইই জোর করে বললো, তোমার কথার একটুও নড়চড় করিনি। বিনি পয়সায় একটা মোয়াও বেচি নি।

কী ভাবে এটা হলো?

## 7. কয়েদীর কেরামতি

গোপাল ভাঁড়ের সঙ্গে থেকে থেকে রাজা কৃষ্ণচন্দ্রের মাথায় কিছু পোকা ঢুকেছিল। তিনজন দাগী আসামী—ডাকাতি, রাহাজানি আর খুনের দায়ে ধরা পড়েছে, ফাঁসি হবেই হবে। রাজা বললেন, তোমাদের বুদ্ধির পরীক্ষা হবে। যদি পাশ করো তো সব খুন মাপ।

তিন জনকেই চোখ বেঁধে দাঁড় করানো হলো। পাঁচটা টুপি আনা হয়েছে—তিনটে লাল রঙের, দুটো কালো। পাঁচটার মধ্যে থেকে যে-কোনো তিনটে টুপি তাদের মাথায় পরিয়ে দেয়া হলো। বাকি দুটো পড়ে রইলো। তারপর তিনজনকে এর-পেছনে-ও-ওর-পেছনে-সে করে দাঁড় করিয়ে চোখের বাঁধন খুলে দেয়া হলো। প্রথম কয়েদী তাহলে সামনের দুজনকে দেখতে পাচ্ছে, দ্বিতীয় কয়েদী দেখতে একজনকে, তৃতীয় কয়েদী কাউকেই দেখতে পাচ্ছে না। রাজা বললেন, বলো, তুমি কোন্ রঙের টুপি পরে আছ।

প্রথম কয়েদী কাতরভাবে বললো, জানি না মহারাজ, তবে আমার সামনে—রাজা বললেন, চোপ্।

দ্বিতীয় কয়েদী কাঁদো কাঁদো গলায় বললো, পারলুম না মহারাজ, তবে—রাজা বললেন, চোপরাও !

তৃতীয় কয়েদী ঝপ্ করে বললো, আমি বলবো মহারাজ ? বলে ঠিক উত্তরটাই দিলো ।

লোকটা কী উত্তর দিয়েছিল ? কী করেই বা বললো ?

## ৪. সত্যাসত্য

শিশিরদের মেস থেকে রেগেমেগে বেরিয়ে ঘনাদা কোথায় যান ? এটা কোনো ধাঁধা নয় । সাধারণত মাছ বা হাঁস বা জানলা বা ফুটো নিয়ে ঝামেলা হয় । আর ঘনাদাও ঐ অছিলায় বেরিয়ে পড়ে আমাদের আড্ডায় পায়ের ধুলো দিয়ে যান ।

সেদিন গম্ভীর মুখ করে এসে ঘনাদা তো বসলেন । তখন তুমুল তর্ক চলচে । বেচারী ভুলান বাগবাজারের কাঁটাপুকুর লেনে এক মাস্টারের সঙ্গে ছাখা করতে গেস্লো । ঠিকানা জানতো না, তাই ও-পাড়ার রকে-বসা ছেলেদের জিগেস করেছে, শ্রামলবাবু কোন্ বাড়িতে থাকেন । ছেলেরা ওকে আধঘণ্টা এধার-ওধার ঘুরিয়ে সেই রকের সামনেই হাজির করেছে । লোকের কথা শুনে, সে সত্যি বলচে না মিথ্যে বলচে বোঝা যাবে কী করে—এই ছিল আলোচনার বিষয় ।

সমস্তটা শুনে ঘনাদা বললেন, এ আর এমন কী সমস্যা । সেবার ঘুরতে ঘুরতে প্রশান্ত মহাসাগরের একটা দ্বীপে গিয়ে পৌঁছেছি । পৌঁছনো মাত্র একটা লোক এলো । ফরাসি বোঝে, মোটামুটি বলতেও পারে । তাকেই গাইড করে নিলুম । আগেই জানতুম, এ দ্বীপের বাসিন্দারা অন্ধুত । যারা সত্যিকথা বলে তারা কখনো সত্যি বই মিথ্যে বলে না, আর যারা মিথ্যুক তারা মরে গেলেও সত্যিকথা বলবে না ।

গাইডের সঙ্গে এখান-ওখান দেখে বেড়াচ্ছি। হঠাৎ একটা লোককে দেখে জানতে ইচ্ছে করলো, লোকটা কী জাতের—সত্যবাদী না মিথ্যেবাদী। লোকটিকে ডেকে জিগেস করলুম। লোকটা দেখলুম ফরাসি বোঝে, কিন্তু কোন্ এক দুর্বোধ্য ভাষায়—না-না, বিনয় করছি না, সত্যিই তার ভাষাটা বুঝতে পারি নি—বললো, গাংহা। গাইডকে বললুম, লোকটা কী বললো হে? গাইড বললো, ও তো স্তর বললো হ্যাঁ, কিন্তু লোকটা মিথ্যেবাদী।

তখন আমার খেয়াল হলো, গাইড নিজে কোন্ জাতের সেটাই তো জানা নেই। তবু—

চেআর ছেড়ে উঠে ঘনাদা শেষ করলেন, ঠিকই বুঝে নিলুম কে কোন্ জাতের।

ঘনাদার কী বুদ্ধি। কিন্তু কী করে যে বুঝলো!

## 9. শহীদ মক্ষিকা

শেষ পর্যন্ত মাছিটা শহীদ হলো। মরতে তার দুঃখ ছিল না, কিন্তু যা করতে চেয়েছিল তাও করা হলো না। বুটমুট প্রাণটা গেলো।

ব্যাপারটা খুলেই বলি। বেণ্ডিলোগাস আর স্টাকামিথিয়া স্টেশন দুটোর দূরত্ব পাক্কা 10 মাইল। নামগুলো জবরদস্ত হলেও স্টেশন দুটো নেহাতই ছোটো, সিংগল লাইনের ট্রেন চলে। একদিন বেণ্ডিলোগাস থেকে একটা ট্রেন ছেড়েচে, চলেচে স্টাকামিথিয়া হয়ে টেরাটোভ্‌স্কার দিকে। আর ঠিক সেই একই সময়ে স্টাকামিথিয়া থেকেও একটা ট্রেন ছেড়েচে, চলেচে বেণ্ডিলোগাস হয়ে কাকানো-ফান্টার দিকে। প্রথমটার গতিবেগ ঘণ্টায় 30 মাইল, দ্বিতীয়টার ঘণ্টায় 20 মাইল। প্রথম ট্রেনটার এঞ্জিনের ওপর হবুশহীদ মাছিটা বসেছিল। ব্যাপারটা বুঝে দ্বিতীয় ট্রেনটাকে সাবধান করার জন্তে

সে উড়লো ঘণ্টায় 300 মাইল বেগে। রেল লাইন ধরে উড়ে সে তাড়াতাড়ি ধরে ফেললো দ্বিতীয় ট্রেনটাকে। এতেই স্টাকামিথিয়ার ড্রাইভারের বোঝা উচিত ছিল। কিন্তু অক্ষপ না-করে সে ট্রেন চালিয়েই চললো। বেচারি মাছি আর কী করে! সে আবার ছুটলো (মানে উড়লো) প্রথম ট্রেনটার দিকে, একটুও সময় নষ্ট না করে। কিন্তু বেণ্ডিলোগাসের ড্রাইভারও তাকে কোনো পাক্সা দিলো না। মাছিটা আর কী করে। বারবার এ-ট্রেন ও-ট্রেন ছুঁয়ে বেড়ালো, যদি শেষ মুহূর্তেও ড্রাইভারছোটোর চৈতন্য হয়। কিন্তু কা কস্ত পরিবেদনা। বেণ্ডিলোগাস আর স্টাকামিথিয়ার ট্রেনছোটো সো—জা মুখোমুখি ধাক্কা মারলো। ছোটো এঞ্জিনের মধ্যে পড়ে মাছিটাও শহীদ হলো।

শহীদ মক্ষিকার সম্মানে ভেবে ছাখো : ছুঁটনা এড়াবার জন্তে তাকে কতটা পথ ওড়াউড়ি করতে হয়েছিল ?

## 10. ছোটো কিন্তু বড়ো সমস্যা

ডক্টর সুশ্রুত কাহালি একজন নামকরা ফিল্যাটেলিস্ট। রুগীর চিকিচ্ছে করে তিনি ডাক্তার উপাধি পান নি। যত সব পুরনো ডাক-টিকিটের গুজ্জবা করেই তাঁর দিন কাটে। এ ব্যাপারে তাঁর জ্ঞান-বুদ্ধিও অগাধ। আমরা ধাঁধা করি শুনে বললেন, ওহে, আমি তো এক 'ঝামেলায় পড়েছি। আমার অভ্যাস হলো, পাশাপাশি না স্টেটে, একটার তলায় আরেকটা স্ট্যাম্প মাঁটা। সৌদি আরাবিয়ার 1 থেকে 5 রিআল-এর (ওখানকার মুজ্জার নাম রিআল, আমাদের যেমন রুপি, ইংল্যান্ডের পাউণ্ড) কত যে স্ট্যাম্প পেয়েছি তার ইয়ত্তা নেই। পাতার তলার দিকে দাবার ছকের মতো পাশাপাশি ও লম্বালম্বি চারটে-চারটে করে বোলোটা ঘর খালি আছে। আমার ইচ্ছে, সব চেয়ে বেশি রিআল-এরটা বেশি ব্যবহার করে স্ট্যাম্প-

গুলো সাঁটি। কিন্তু কোনো একই দামের স্ট্যাম্প পাশাপাশি বা কোণাকুণি বসাবো না। কিছু একটা উপায় বাতলাও দিকি। আমি চাই, অন্তত 50 রিআল-এর স্ট্যাম্প থাকুক।

ছাথো কী করে করা যায়।

## 11. তুরুপের রং

ব্রিজ খেলতে বসে মাঝে মাঝে এমন অদ্ভুত তাস হাতে পড়ে যে কহতব্য নয়—বললেন চ্যাম্পিয়ন ব্রিজ-খেলোয়াড় সুগন্ধ চাকলানবীশ। তাস-টাস তো ভালো করেই কাটিয়ে দিয়েছি, এক-দুই করে তেরোটা তাস পেলুম। তারপর ভাই সাজাতে গিয়ে দেখি অদ্ভুত কাণ্ড। হাতে চার রঙেরই তাস এয়েচে, প্রত্যেক রঙেরই অন্তত একটা করে তাস আছে, কিন্তু কোনো ছোটো রঙের তাসের সংখ্যা এক নয়। আমার হাতে ছিল পাঁচটা রুইতন আর চিঁড়েতন, ছটা হরতন আর রুইতন। আর তুরুপের রঙের ঠিক ছোটো তাস।

আমরা অবাক হয়ে জিগেস করলুম, তুরুপের রং কী ছিল? চাকলানবীশ মুচকি হেসে বললেন, সেটাই তো ধাঁধা।

## 12. গয়লার কেরামতি

রামধন গয়লার কারবারই আলাদা। ছ-হাতে তিনটে বালতি নিয়ে বীরবিক্রমে চলেচে। ছোটো অবস্থা খালি, একটায় 5 সের দুধ ধরে, অন্যটায় 3 সের। আরেকটা বালতিতে 8 সের দুধ ধরে—সেটা একেবারে ছাপাছাপি ভর্তি। মা দেখে গালে হাত দিয়ে বললেন, তোমার কাণ্ড দেখে বাপু গা জলে যায়। বাড়িতে জামাই এসচে, একটু পায়েস করবো, আমার 4 সের দুধ চাই। তা এখন দেবে কী করে? তোমার যা হাতের মাপ, ঐ 8 সের বালতির আদ্যেক কি ঠিক করে দিতে পারবে?

রামধন নির্বিকার মুখে বললো, সে আপনি ভাববেন না, মা। এই তিনটে বালতি দিয়েই আপনাকে ঠিক 4 সের দোবো। ঢালা-ঢালিতে কয়েক ফোঁটা এদিক-ওদিক হতে পারে। কিন্তু সে খর্ববোর মধ্যে নয়।

অদ্ভুত রামধনের বুদ্ধি! কী করে ঠিক 4 সের দিলো বলো তো?

### 13. ভাই ভাই

গণনাথ, হরিশ, পটল, সম্রাট, জোকার আর শিশেবাবু—ছজনেরই পুরনো বই-এর ব্যবসা। সারা ভারত জুড়ে এঁদের লোক লাগানো আছে। কোথায় কোন্ রাজা-রাজড়া বা বড়োমামুষের সংগ্রহ বা পুরনো লাইব্রেরির বই বিক্রি হচ্ছে, ঠিক খবর চলে আসে। বাস, সঙ্গে সঙ্গে দেখবে হাওড়া স্টেশনে ছ-মূর্তি হাজির। হ্যাঁ, বলতে ভুলে গেছি, এই ছজনের মধ্যে দুজন হচ্ছেন জার্তুতো-খুড়তুতো ভাই।

সেবার বেনারসের গাড়োয়ানতলা লেনে ছ-মূর্তি বই কিনতে গেলেন। যাঁর বই তিনি সাফ বলে দিলেন, দরদস্তুর চলবে না। যা লেনদেন হবে সব পূর্ণ সংখ্যায়। পঞ্চাশ টাকা বললে চল্লিশ টাকা, শেষে চুয়াল্লিশ টাকা তিপাল্ল পয়সায় রফা—ওসব চলবে না।

ছ-মূর্তি রাজি হলো। গণনাথ কিনলো একটা বই, হরিশ দুটো, পটল তিনটে, সম্রাট চারটে, জোকার পাঁচটা আর শিশেবাবু ছ-টা। এদের মধ্যে যে দুজন জার্তুতো-খুড়তুতো ভাই, তারা প্রত্যেক বই-এর জন্তে সমান দাম দিলো। বাকি চারজনকে প্রত্যেক বইপিছু ঐ দুভাই যা দাম দিয়েচে তার ডবল দাম দিতে হলো। সব মিলিয়ে ছ মূর্তি কিনলো এক হাজার টাকার বই, যদিও সেগুলো তারা বেটবে নিদেনপক্ষে দশ হাজারে।

ধাঁধাটা তাহলে কী ? কে কত টাকার বই কিনেচে ? আরে না না, সে তো সবাই বলতে পারবে। কথা হলো : এই ছ-মূর্তির কোন্ দুজন জাতু'তো-খুড়তুতো ভাই ?

## 14. বি'বিপোকায় কারা

প্রথম দিনের খেলা শেষ। খাওয়ার স্পোর্টিং ক্লাব টেসে জিতে-ছিল। টেনিদা পিচ-টিচ দেখে ক্যাবলকে বললো, মাঠের যা অবস্থা, বল মারাত্মক স্নুইং করবে। ব্যাট না নেয়াই ভালো। ক্যাবলা প্রতিবাদ করতে যাচ্ছিল, কিন্তু গাঁড়ার কথা ভেবে চেপে গেলো। টেনিদা তো মহা উৎসাহে বল করতে শুরু করলো। হা হতোশ্মি। সারাদিন ছোটোছুটি করে, মায় প্যালাকে দিয়ে বল করিয়েও কিছু করা গেলো না। ভ্যাগাবণ্ডস্ ক্লাবের মাত্র তিনটে উইকেট পড়লো। প্রথম দিনের শেষে বিধ্বস্ত টেনিদা আর তার সান্ধোপাঙ্গরা বাড়ি ফিরলো।

প্যালার ছোটোকাকার মতো খারাপ লোক আর হয় না। তিনি তাদের অবস্থা'দেখে কোথায় সহানুভূতি ছাখাবেন, তা না, এক গাল হেসে জিগেস করলেন, কি হে ক্যাবল, ভ্যাগাবণ্ডদের কে সব চেয়ে বেশি রান করলো ? ক্যাবলার এমনিতেই মেজাজ খারাপ হয়ে ছিল। ঘোঁচ মুখ করে বললো :

ওদের ক্যাপটেন আর ভাইস-ক্যাপটেনের রানের যোগফল 109

ওপনারদের রানের যোগফল 114

যে দুজন এখনো খেলচে তাদের রানের যোগফল 108

যে দুজন মনের আনন্দে ক্যাচ তুলে আউট হয়েছে, তাদের রানের যোগফল 115

যে দুজন একই বোলারের বলে আউট হয়েছে, তাদের রানের যোগফল 111

মাত্র দুজন ছক্কা মেরেচে, তাদের রানের যোগফল 110



বল্টুনা আর তার ভাই মিলে রান করেছে 112 .

আর যে দুটো খেলোয়াড় ওদের টিমে নতুন খেলচে, তারা দুজনে একই রান করেছে। আর ওরাই যে সবচেয়ে কম রান করেছে তা-ও না। এখন বুঝে নিন কে সবচেয়ে বেশি রান করেছে।

ছোটোকাকা তো ঘাবড়ে-মাবড়ে বাড়ির ভেতর চলে গেলেন। এখন তোমরাই একটু হিসেব করে ছোটোকাকাকে তাঁর উত্তরটা দিয়ে দাও।

## 15. বাঘা দাবাড়ের কাণ্ড

বোড়ে গাঙুলিকে অবশ্য সবাই চেনেন না। কিন্তু অমন একনিষ্ঠ দাবাড়ে বড়ো একটা ছাখা যায় না। বিপত্নীক ভদ্রলোক। বাড়িতে আছেন তাঁর এক বোন, এক ছেলে আর এক মেয়ে। চারজনেই বাঘা দাবাড়ে।

বোড়ে গাঙুলি কিন্তু বলেন, আমাদের চারজনের মধ্যেও সেরা খেলোয়াড়-ওঁ'ছা খেলোয়াড়ের ব্যাপার আছে। ওঁ'ছা খেলোয়াড় যদি মেয়ে হন তবে সেরা খেলোয়াড়ের যমজ হবেন ছেলে, আর ওঁ'ছা খেলোয়াড় যদি ছেলে হন তবে সেরা খেলোয়াড়ের যমজ হবেন মেয়ে। তবে ভরসার কথা এই যে, সেরা খেলোয়াড় আর ওঁ'ছা খেলোয়াড়ের বয়েস এক। তাহলেই বুঝতে পারছেন, আমাদের মধ্যে সেরা দাবাড়ে কে।

আমি তো সবজাস্তার হাসি হেসে ফিরে এলুম। কিন্তু সেরা দাবাড়েটি তা'লে কে?

## 16. দুধে-জলে

অভ্যেস দূর করা যে কত শক্ত সেটা রামধন গয়লাকে দেখলে বোঝা যায়। দুটো এক আয়তনের বালতি, একটায় রয়েছে এক লিটার দুধ, অন্টাটায় এক লিটার জল। ধারে-কাছে কেউ নেই দেখে

রামধন চট করে 5 সি. সি. জল নিয়ে ছুধের বালতিতে মিশিয়ে দিলো। তারপর মেজোকাকাকে আসতে দেখে সেই জল-মেশানো ছুধ থেকে 5 সি. সি. নিয়ে জলের বালতিতে ঢেলে দিলো।

এখন রামধন ভাবচে জলের বালতিতে ছুধের পরিমাণ বেশি, না ছুধের বালতিতে জলের পরিমাণ বেশি। পাঠকের কী মত?

## 17. প্রচ্ছন্ন পাটীগণিত

গোদাবরীর তীরে, সেই বিখ্যাত শাল্মলী তরুর ছায়ায় ধুনি জ্বালিয়ে বসে থাকেন এক মৌনীবাবা। ছট্টু একদিন তাঁকে জিগেস করলো, আচ্ছা, আপনি কতবার এপার-ওপার করেছেন? মৌনীবাবা কাঠকয়লা দিয়ে লিখে দিলেন : 1129. ছট্টু ভাবলো, বাব্বা, এক হাজার একশ উনতিরিশ বার নদী পার হওয়া কি চাট্টিখানি কথা? আসলে কিন্তু মৌনীবাবা লিখেছিলেন : একবারো নয়।

অক্ষরের বদলে সংখ্যা লিখে গোপন খবর পাঠাবার ব্যবস্থা অনেক দিনের পুরনো। এর নাম হলো cryptography বা প্রচ্ছন্ন-লিপি। এরও আবার হাজারো কৌশল আছে। আসল কথা বার করতে এক-একবার এক-এক রকম কায়দা কাজে লাগাতে হয়। প্রচ্ছন্ন পাটীগণিত বা cryptarithmic হলো এরই উলটো। সংখ্যার বদলে অক্ষর লিখে অংক করা।

ক্রিপ্টোরিথমেটিক নাম দিয়ে ব্যাপারটা চালু করেছিলেন ‘মাইনোস’ ছদ্মনামের আড়ালে প্রচ্ছন্ন খেঁখেল এম. ভাক্রিক্যাং। “ফিংক্স” নামে বেলজিঅম-এর এক মজার অংক-পত্রিকায় ব্যাপারটা প্রথম বেরোয় (মে, 1931)।

ব্যাপারটা দাঁড়ায় এই র’ম : বাবা + সিসি = মাসিমা।

যোগফলটা মেলাতে গেলে ‘মা’ হবে 1, কারণ দু অংকের ছুটি রাশির যোগফল যদি তিন অংকের হয় তবে যোগফলের শতকের ঘরের অংকটি 1 ছাড়া আর কিছুই হতে পারে না। ‘বা’ আর ‘সি’

0 হতে পারে না। সুতরাং 'বা' আর 'সি'র যোগফল হবে 11 ; তাহলে 'বা' + 'সি' + হাতে 1-এর যোগফল দাঁড়ায় 12. অতএব 'সি' = 2, 'বা' = 9, অর্থাৎ, বাবা + সিসি = মাসিমা মানে  $99 + 22 = 121$ .

বলে রাখা ভালো, এর কোনো সূত্র বা ফর্মুলা নেই। বুদ্ধি খাটিয়ে, লেগে থেকে অক্ষর ভেঙে অংক বার করতে হয়। তবে এই পাটীগণিত করতে থাকলে কয়েকটা সাধারণ নিয়ম পাওয়া যাবে। এখন দুটো সমস্যা দেয়া যাক। সমাধান করো :

অ ম ল	
ধ ব ল	
জ ল জ	ক ল ম
+ ক ম ল	× ক ল ম
৳ ল ম ল	হ য ব র ল

## 18. বন্দী পতঙ্গ

রোজ রাত্তিরে এক কাপ হরলিকস খাওয়া টিপুবাবুর অনেক দিনের অভ্যাস। তাঁর ছেলে টিফুর 'হবি' হলো পোকামাকড় জোঁগাড় করে সেই খালি হরলিকসের বোতলগুলোয় ভরে রাখা। একদিন দুটো অদ্ভুত পোকা পেয়ে দুটো খালি বোতলে রাখতে গেলো। হঠাৎ কী ভেবে চোখ বড়ো বড়ো করে দাঁড়িয়ে রইলো।

ব্যাপারটা কী ? টিফু বললো, দেখুন, দুটো বোতলই যদি পাল্লায় চাপাই, একই ওজন হবে। এবার দুটোরই ঢাকনা খুলে ঢাকনা দুটো পাল্লাতেই রাখলুম। পোকা দুটো বোতলের গায়ে বা তলায় বসলো না, বোতলের মধ্যেই উড়ে বেড়াতে থাকলো। তখন একটা বোতলের ঢাকনা তুলে সেটা বন্ধ করে দিলুম। অণ্ডটা যেমন ছিল তেমনই রইল। এখন দুটো বোতলের ওজনে কিছু কমবেশি হবে কি ?

কী আর করি। আমিও গালে দিয়ে ভাবতে বসে গেলুম।

## 19. ঘনরাম দাসের দিনপঞ্জি থেকে

না তন্তু তন্তু। ঘনাদার সেই পূর্বপুরুষ, যিনি কৰ্ত্তেজ-পিজারোর সঙ্গে মেঞ্জিকো-পেরু ঘুরে বেড়িয়েছিলেন। তাঁরই দিনপঞ্জিতে এই আশ্চর্য ঘটনাটি লেখা আছে। সেটাই ছেপে দিচ্ছি :

31 ডিসেম্বর, 1499—আলমিরাস্তে দন ক্রিস্তোবাল কোলোন ( অর্থাৎ ক্রিস্টফার কলম্বাস ) মার্গারিতা দ্বীপে সাতিশয় মার্জিত এক রাজ্যের সহিত মিলিত হইলেন। হিসপানিওলার আদিম মানবগণ তাঁহাকে দর্শন করত যদ্রূপ বলিলুপ্তিত হইয়া প্রণতি জানাইয়াছিল, এই বাজ্ঞ ও তাঁহার অনুচরবর্গ তদ্রূপ কিছুই করিলেন না। শুদ্ধ ইঞ্জিতে জানাইলেন, তাঁহারা আলমিরাস্তের জ্ঞাই অপেক্ষমাণ। আলমিরাস্তে তাঁহার সহিত এক মহাশৈলের অভ্যন্তরে প্রবিষ্ট হইলেন। কাঞ্চনকামী কোলোন বিমূঢ়। এক সুবহৎ নগরী সেই ছুরধিগম্য গুহার শোভা। তাহার প্রতিটি ইষ্টক সুবর্ণনির্মিত! সূর্য্যাকিরণ সেই মহাতিমিবে প্রবেশাধিকার লভে নাই। তত্রাচ ঐ হৈমনগরী চিরসন্দীপ্তিমান। অভিভূত আলমিরাস্তে প্রশ্ন করিলেন, এই নগরী কত প্রাচীনা? উত্তরে রাজ্ঞ কহিলেন, এই অরুণাদিত্যপুরী মহাকালের অর্দ্ধবয়স্ক। অযুত বৎসর পূর্বে এই নগরীর যাহা বয়স ছিল তাহা অত্ হইতে অযুত বৎসর পর মহাকালের বয়স যাহা হইবে তাহার ত্রি-অষ্টমাংশ। সুতরাং বিবেচনা করুন এই নগরী কত প্রাচীনা। দন ক্রিস্তোবাল বাক্য নিঃসরণ করিতে অপারঙ্গম হইলেন। তাঁহার চেতনা ধীরে প্রলুপ্ত হইল। বহু দণ্ড অতিক্রান্ত হইলে পর সহসা আবিষ্কার করিলেন তিনি বালার্করাগরঞ্জিত বিজন বালুতটে শয়ান। সেই মহাশৈলের কোনো সন্ধান অত্াপি মিলে নাই। সকলেই আল-মিরাস্তেকে কিঞ্চিদধিক উপহাস করিতেছে। আনি কিন্তু তাঁহাকে বিশ্বাস করিয়াছি।

ঘনরাম দাস সে মায়াপুরীর খোঁজ পেয়েছিলেন কিনা জানি না। আমাদের সমস্তা হলো : সে শহরের বয়েস এখন তাহলে কত হবে ?

## 20. আপত্তিকর চিঠিচাপাটি

আমাদের ‘ধাঁধা’ পত্রিকার দপ্তরে নানা ধরনের চিঠি আসে। বেশির ভাগই গত্তে, মাঝে মাঝে পত্তে। প্রথম-প্রথম পত্তে চিঠি পেলে ভালোই লাগতো। এই যেমন সেদিন একটা এলো :

‘ধাঁধা’ অতি খাসা কাগজ  
খাচ্কা খেলুম নিম-এর বেলায়  
অংক কষার ব্যাপার আছে  
তিন-পাঁচ-সাত কাঠির খেলায় !  
বার কয়েক তো হেরেই গেলুম,  
জিত্তার এখন উপায়টি কী ?  
কায়দাটুকু জানার জন্তে  
গচ্চা গেলো তিনটি সিকি। ইত্তি  
জগমোহন দাঁ।

আমাদের সম্পাদক তো রেগে কাঁই। তক্ষুনি খসখস করে লিখে ফেললেন :

ওহে বাপু জগমোহন  
তোমার ঘিলু করলে দোহন,  
গাদা খানেক গোবর পাবে,  
ধার করা তাও ! শুধবে কবে ?

তারপর আমাদের দিকে তাকিয়ে বললেন, কেমন দিলুম ?

আমরা তো হাঁ ! বলে কি ! অমন চমৎকার ছড়ার জবাবে এ র’ম সাংঘাতিক ছর’রা ! সম্পাদক তখন মুখ টমেটো করে বললেন, আত্মক্ষরী গালাগাল—অসহ !

ব্যাপারটা তখন বোঝা গেলো। চিঠিটার প্রত্যেক চরণের প্রথম অক্ষরগুলো ওপর থেকে নীচে পড়ে যাও—সতিই সম্পাদকের চটে যাওয়ার কারণ আছে। তাই বলে দাঁবাবুকে গাধা বলাটা কি উচিত হলো ?

আত্মকরী বা Acrostic ব্যাপারটা কবিতার কারিকুরির ইতিহাসে অনেক দিনের পুরনো। হিব্রু ধর্মগ্রন্থে, বাইবেলের পুরাতন নিয়ম বলে যা চালু, বহু জায়গায়, যেমন, ‘বিলাপগ্রন্থে’র প্রথম চারটি কবিতায়, ‘প্রবাদমালা’র 31নং কবিতায়, রাজা দায়ূদের 19নং গীতে হিব্রু বর্ণমালার আলেফ থেকে তাউ পর্যন্ত বাইশটি বর্ণ ওপর থেকে নীচে সাজানো আছে। ইংরিজিতেও এমন অনেক কবিতা পাওয়া যায়। বিখ্যাত হলো কিট্‌স্‌-এর Give me your patience, sister, while I frame, যার প্রত্যেকটি চরণের প্রথম অক্ষর জুড়ে কবির বোন জর্জিআনা অগাস্টা কিট্‌স্‌-এর নাম পাওয়া যায়। “আজব দেশে অ্যালিস”-খ্যাত লিউইস ক্যারল “আয়নার মধ্যে দিয়ে” (*Through the Looking Glass*) বইটির শেষ কবিতায় আত্মকর সাজিয়ে অ্যালিস-এর আসল নামটি লিখে দিয়েছেন।

বাংলাতেও এককালে এর বেশ চর্চা ছিল। ঈশ্বর গুপ্তকে গালা-গাল দিয়ে একটা আত্মকরী লিখেছিলেন “হুর্জনদমন মহানবমী” পত্রিকা (বিনয় ঘোষ, “বিদ্যাসাগর ও বাঙালী সমাজ,” কলকাতা : ওরিয়েন্ট লংম্যান, কবিতাটি বেশ সরল ঈশ্বর-বন্দনা, কিন্তু আত্মকর ধরে পড়ে চললে বড়োই খারাপ কথা। মধুসূদন যখন হিন্দু কলেজে পড়তেন তখন তিনি কবিতা লিখতেন ইংরিজিতেই, কিন্তু এমন অস্তুত একটা বাংলা কবিতা পাওয়া গ্যাচে (‘বর্ষাকাল’) যার আত্মকর পড়লে তাঁর বাল্যবন্ধু গৌরদাস বসাকের নাম পাওয়া যায় (মধুসূদন রচনাবলী, কলকাতা : হরফ প্রকাশনী,

নজরুল ইসলামও স্কুলে পড়তে এক মাস্টারমশায়ের বিদায় উপলক্ষ্যে একটা আত্মকরী লিখেছিলেন। তার কায়দাটা একটু আলাদা। প্রত্যেক স্তবকের প্রথম চরণের প্রথম অক্ষরে নিজের

নামের এক-একটা অক্ষর রয়েছে (খান মইনুদ্দীন, “যুগশ্রুতি নজরুল,” কলকাতা : হরফ প্রকাশনী, 1377 বঙ্গাব্দ, পৃ 13-16 ড)।

পরে অবশ্য আত্মক্ষরী ব্যাপারটা খানিক খাপছাড়া চেহার। নিয়েচে। অ্যাক্রস্টিক-এর মধ্যে মধ্যাক্ষরী বা অন্ত্যাক্ষরীও ঢুকে গ্যাচে। ওপর-নীচ ছুভাবে পড়া যায়—এমন কবিতাও লেখা হয়েছে। কবিতা হিসেবে সব সময় যে ভালো হয়েছে তা নয়, তবে কৌশলটাও তো ছাখার জিনিস।

আত্মক্ষরীর আসল মজাটা কোথায়? কবি তো যা হোক করে অক্ষরগুলো সাজিয়ে, মুখ-টিখ মুছে, দিবিয়া ভালোমানুষ সেজে বসে থাকলেন। পাঠক এখন সেটা ধরতে পারলো কিনা—এই হলো সমস্যা। না পারলে অবশ্য খুব ঝামেলা। যেমন আমাদেরই হয়েছিল। এই তো সেদিন একটা চিঠি এলো--

আপসে লোকে প্রশংসা করবে,  
নারাজ লোকও হাঁরাজ হবে ঠিক,  
এতই চালক মানুষ ধাঁধাডুরা—  
বোকায় মানে খোঁজে চতুর্দিক।

আমাদের সম্পাদক চটে গিয়ে উত্তর পাঠালেন, তোমার মতো নয়।

আমাদেরই এক বন্ধুকে গ্রাহক হতে বলে পত্রিকার প্রথম সংখ্যাটা উপহার পাঠিয়েছিলুম। বন্ধু চিঠি লিখে জানালো :

ধাঁধার পরের সংখ্যা আবার কবে পাওয়া যাবে?  
ধারণা করতে পারবে না, প্রথম সংখ্যা পেয়ে গৃহ  
কপোতের মতো আনন্দে বকবকম করে উঠেছিল বন্ধ  
বেতাল। মনটা। বলছ যখন, নিশ্চয়ই গ্রাহক হব।

কোথায় নতুন গ্রাহক পেয়ে খুশি হবে, তা না, সম্পাদক চটে উঠে বললেন, লিখে দে, ধাঁধা চলচে—চলবে।

কিন্তু ব্যাপারটা খুব গুরুতর হয়ে দাঁড়ালো গত তরশু । একটা চিঠি এলো :

ধাঁধা করতে যেই বসেচি কাগজ-কলম সব সাজিয়ে  
বাধা পড়লো সঙ্গে সঙ্গে । হাজির হলো বেল বাজিয়ে  
সরেস যত পাড়ার ছেলে, বদবুদ্ধি ভর্তি মগজ,  
বলে ‘চম্পাহাটী চলুন, কত নেবে টেরিন ছ-গজ ?’  
কত টাকা দক্ষিণা তার জানব আমি কেমন করে ?  
কাপড়-জামা কেনার সময় ঠিক নিয়ে যায় আমায় ধরে ।  
বলবে ওরা, ‘দর কমাতে আপনি ছাড়া পারবে বা কে ?  
কেই বা জানে কোন্ মূল্যকে সময়ের দাম পড়তে থাকে ?  
কোথায় থাকে হীরু কুণ্ডু, কোথায় লগুনী পৈতে কাচার  
কোথায় পাব খুব ভালো চা, মুড়ির সঙ্গে তেলের আচার ?’  
আমার তো ভাই চিরদিনই ধাঁধা করতে দারুণ ইচ্ছে,  
কিন্তু সময় পাচ্ছি না যে, পাড়ার লোকে বাধা দিচ্ছে ।

সম্পাদক চিঠিটা একবার পড়লেন, দুবার পড়লেন, তারপর  
হেড অপিসের বড়োবাবুর মতো আঁতকে উঠে নিজেই পড়ে গেলেন ।  
জ্ঞান হারানোর আগের মুহূর্তে শুধু হেঁচকি তুলতে তুলতে বললেন,  
থানায় খবর দে, লোকটার নাম শেব লাইনে লেখা আছে । তাঁর  
এই অবিস্ময়কারিতায় আমরা তো কিংকর্তব্যবিমূঢ় ।



## 21. বাটপাড়িয়া হত্যা রহস্য

বিখ্যাত নিরঙ্কর ধনকুবের দৌলতরাম বাটপাড়িয়ার মৃত্যু রহস্য শেষ পর্যন্ত রহস্যময়ই রয়ে গেলো।

তদন্তের কোনো 'ত্রুটি' ছিল না। পায়ের ছাপটা যে মেক্সিকোর কোনো ইনকা-র, তার অকাট্য প্রমাণ ছিল। ঘটনাচক্রে যা ঘটী স্বাভাবিক, অর্থাৎ হত্যাকারীর পকেট থেকে তুলোটি কাগজে লেখা এক টুকরো 'কিপু'ও মৃতদেহের পাশে পড়ে ছিল। আর পুরো ব্যাপারটাই যে একটা বিরাট আন্তর্জাতিক ষড়যন্ত্রের অংশ তা নিয়েও কোনো সন্দেহ বা সংশয় ছিল না।

মুশকিল হয়েছিল অণু জায়গায়। এ সমস্ত ক্ষেত্রে সচরাচর যা ঘটে থাকে, সেগুলোর কোনোটাই দৌলতবাবুর বেলায় খাটে না। এক নম্বর, হত্যার সময় বাড়িতে চাকর-বাকর ছাড়া আর কোনো জনপ্রাণী না থাকাই নিয়ম (খুব বেশি হলে একজন অতিবৃদ্ধা কালী পিসি থাকতে পারেন)। কিন্তু দৌলতবাবুর আত্মীয়-স্বজন অতিথি-পরিজন মিলে বাড়িটা ছিল ফোর্ট উইলিয়াম-এর মিনি সংস্করণ। তারাই সবাই রাত দশটায় দৌলতবাবুর আর্তনাদ শুনেচে। কিন্তু দৌলতবাবু আরশোলা দেখলেও ঐ একই রকম চিল-চিংকার করতেন, তাই কেউ বিশেষ গা করে নি। একমাত্র তাঁর নিজস্ব চাকর সাগর ছুটে গেস্লো। সে শুধু দৌলতবাবুকে গুলিবিদ্ধ অবস্থায় পড়ে থাকতে দেখেচে, আর কিছু ছাথে নি। ফলে দুঃস্বপ্ন মুশকিল হয়েচে সেই ছোকরাকে নিয়ে। নিহত ব্যক্তির ভৃত্য বহু পুরাতন এবং বিশ্বস্ত হওয়ার কথা। কিন্তু সাগর মাত্র দিনকুড়ি হলো কাজে ঢুকেচে, আর দিনদশেক বাদেই তার চাকরি চলে যাওয়ার কথা।

চার নম্বর মুশকিল এইখানেই। এ বাড়ির সকলেই দৌলতবাবুর ওপর চটা ছিল। সকলেই বলচে, সময়-সুযোগ হলে তারাই দৌলতবাবুকে খতম করতো, শুধু অণু কে যেন সেটা করে দিয়ে গ্যাচে।

সুতরাং হত্যার উদ্দেশ্য বা মোটিভ ধরে কিছু ঠিক করতে গেলে কাঁকর বাছতে কুলো উজাড় হওয়ার অবস্থা।

গোয়েন্দা টিকেকাশি (ইনি হুঁকোকাশির ভায়রাভাই কঙ্কেকাশির ভায়রাভাই) অবশ্য ‘কিপু’ পড়ার জগ্গে কিউবা-র কনসুলেট অপিসে যেতে চেয়েছিলেন। রামধমক দিয়ে সবাই তাঁকে থামিয়ে দিলো। তিনি কিন্তু ব্যাপারিয়া হত্যা রহস্যের ব্যাপারে লেগে রইলেন। ‘কিপু’র কাগজটা উল্টে পাল্টে দেখে তো তাঁর চক্ষুস্থির। কিপু না ছাই, একটা সংখ্যা-লেখা কাগজ, ওড়িয়ায় লেখা 227187.

প্রথমে মনে হলো নির্ঘাত টাকার হিসেব। একটু ভেবে তিনি এর সংখ্যামূল নির্ণয় করলেন। তারপর ঘাড় দোলাতে দোলাতে বললেন, হুঁ হুঁ। যা ভেবেচি তাই। চারজন মিলে এ-কাজ করেছে। এই সংখ্যামূল থেকেই তো ধরা পড়ে গেলে চাঁদ। এবার হাতকড়া পরালেই হয়। পষ্ট বুঝতে পারচি, একজন আগে থাকতে ঘবে ঢুকেছিল, আরেকজন কেশনগর থেকে আরশোলা কিনে এনেছিল, আরো একজন ইনকাম ট্যাক্স অফিসর সেজেছিল, আর ঐ ছোকরা চাকর ছুরিটা সমূলে বসিয়ে দিয়েচে। দৌলতবাবু ঘরে লোক দেখে প্রথমেই চমকে উঠেছিলেন, তার পরেই দেয়ালে আরশোলা দেখে আর্তনাদ, ইনকাম-ট্যাক্স ইন্সপেক্টরকে দেখে বাক্রোধ, আর সাগরও সেই সুযোগে—। নাক দিয়ে একটা আওয়াজ কবে টিকেকাশি বললেন, হয়েছে।

কিন্তু প্রমাণ কোথায়? ঘরে কোনো আরশোলা পাওয়া যায় নি। সাগরের প্রধান কাজ ছিল রোজ সকাল-সন্ধ্যে আরশোলা খুঁজেখুঁজে মারা। অবশ্য একটা টিকটিকি ছিল বলে শোনা গ্যাচে। টিকেকাশি বললেন, এলিমেন্টারি, মাই ডিআর—। ঐ টিকটিকিটাই আরশোলাটাকে খেয়ে ফেলেচে। বাকি দুজন লোক গেলো কোথায়? টিকেকাশির নিশ্চিত ধারণা, ওরা নিশ্চয়ই বাড়ির ভেতরের লোক, সুতরাং তাদের ঢোকা ও বেরোনের কোনো অশুবিধেই ছিল না।

পুলিস কমিশনার মিস্টার দাশগুপ্ত ঘাড় নেড়ে স্বীকার করলেন, তা সম্ভব। কিন্তু এত কথা টিকেকাশি জানলেন কী করে? মৌরি হেসে টিকেকাশি 'কিপু'র কাগজটা বাড়িয়ে দিলেন। কমিশনার ঢোক গিলে বললেন, এতো আমার ফোন-নাম্বার মশাই, এর থেকে আবার কী বেরোবে? উনি বোধহয় আমায় ফোন করেছিলেন। জানেনই তো, আমার ফোন-আওয়ার সকাল পৌনে ন-টা থেকে সোয়া ন-টা।

টিকেকাশি শুকনো মুখে বেরিয়ে এলেন। জীবনে কোনোদিন তাঁর এত অপমান হয় নি। সোঁজা বাড়ি গিয়ে ঠিক করলেন, আর গোয়েন্দাগিরি নয়। এখন থেকে তিনি সেরেফ অংক করবেন। গোড়া থেকে শুরু করাই ভালো, তাই ভাইঝির কাছ থেকে একটা ধারাপাত চেয়ে নিয়ে ঘরের দরজা বন্ধ করে দিলেন। ঘটাচারেক বাদে তাঁকে আবার উত্তেজিত অবস্থায় কমিশনারের দপ্তরে ঢাখা গেলো।

কমিশনার অবশু ভদ্রতার ক্রটি করলেন না। চা-টা খাইয়ে টিকেকাশির বক্তব্য শুনে বললেন, কী নাম বলছেন? পক্ষ পক্ষ ঋষি চন্দ্র বসু ঋষি? না মশাই, ও র'ম নামের কোনো কুখ্যাত খুনী বা খুনীগণ আছে বলে মনে হয় না। মানে, ইন্টারপোল-এ থাকতে পারে, আমাদের জানা নেই। তাছাড়া নামতা থেকে নাম পাওয়া যেতে পারে, তাই বলে টেলিফোন-নাম্বার থেকে নাম বার করবেন? টিকেকাশি অনেক করে তাঁকে বোঝালেন, না হলে ঐ কাগজটা পড়ে থাকার কোনো মানে হয় না। কিন্তু মিস্টার সেনগুপ্ত বেল বাজিয়ে পরের লোককে আসতে বললেন।

+

—

+

কয়েক বছর পরের কথা। টিকেকাশি এখন সেরেফ ভাষাতত্ত্ব চর্চা করেন। হঠাৎ সকালে কাগজ পড়ে লাফিয়ে উঠলেন। সাগর বসু ওরফে ব্রহ্মর্ষি ( দেখতে ভিজ়ে বেড়ালটি ছিল বলে বাচ্চা ব্যেস থেকেই

বন্ধুরা ঐ বলে খাপাতো ) গতকাল সমগ্র অপরাধীজগৎকে চোখের জলে ভাসিয়ে সাধনোচিত খামে প্রস্থান করেছেন। সাগর বসু ওরফে ব্রহ্মর্ষি !! টিকেকাশি যেন 440 ভোল্টের শক খেলেন। সাগর মানে সিন্ধু মানে 7, বসু মানে 8, ব্রহ্ম মানে 1, ঋষি মানেও 7. হায় হায়, তখন যদি ধারাপাত না পড়ে “ভাষার ইতিবৃত্ত”টা পড়তেন ! কবিশকাব্দের কায়দায় গৌরববাবু তো খুনীর নামটাই লিখে গেস্লেন, শুধু একটু ভুলের জগ্গে—! সাথে যে ঋষি সাগর দুইই হয়, একে চন্দ্র আর ব্রহ্ম !

ভুল একটা নয়। পুরো গল্পটাই ভুলে ভরা। তথ্য আর বর্ণনায় এ-র’ম কত ভুল আছে, পাঠক কি খুঁজে বার করবে ?

## 22. যাদুবর্গ ও বিযাদুবর্গ

যাদুবর্গ (magic square) ব্যাপারটা এতই চালাু যে কাউকে বোঝাতে গেলেই বিরক্ত হবে। 1 থেকে শুরু করে বর্গের মতো সাজানো পূর্ণ সংখ্যা, যার প্রত্যেক সারির ওপরে-নীচে, পাশাপাশি এবং প্রধান দুটি কর্ণ যোগ করলে একই যোগফল পাওয়া যাবে। ব্যাপারটা এতই চমৎকার যে, লোকে লকেট করে যাদুবর্গ গলায় পরে, আংটি করে হাতে রাখে। যাদুবর্গ তৈরির কৌশল নিয়ে এককালে অনেক হৈচৈ হয়েছে, ভল্লুম ভল্লুম বই বেরিয়েছে।

ছ ঘরের যাদুবর্গ তো সম্ভব নয়, অন্তত তিন ঘরের হতেই হবে। তিন ঘরের যাদুবর্গের (1 থেকে 9 অবধি ব্যবহার করে) সব দিকের যোগফল হবে 15, চার ঘরের 34. পাঁচ ঘরের বা ছ ঘরের যাদুবর্গের যোগফল তাহলে কত হবে? এর কোনো সাধারণ সূত্র বার করতে পারো?

যাদুবর্গের সংখ্যাগুলো 1 থেকেই শুরু করতে হবে এমন কোনো কথা নেই। 2 বা 3 বা আরো বড়ো সংখ্যা থেকে শুরু করে পরপর আটটা বা পনেরোটা বা চব্বিশটা সংখ্যা নিয়েও যাদুবর্গ সাজানো যায়। এমন কিছু শক্ত ব্যাপার নয়, কিন্তু এখানেও একটা প্রশ্ন আছে। 1 থেকে শুরু না-করে যদি অথ কোনো সংখ্যা দিয়ে শুরু করি, তাহলে তিন ঘরের যাদুবর্গ সাজানোর সাধারণ সূত্রটা কী হবে?

শুধু জোড় বা বিজোড় সংখ্যা দিয়ে চমৎকার যাদুবর্গ সাজানো যায়। প্রথম ন-টি বিজোড় সংখ্যা 1, 3, ..., 15, 17 দিয়ে তিন ঘরের বর্গের একটা নমুনা দিচ্ছি :

7	5	15
17	9	1
3	13	11

যাছুবর্গের খোঁজ সবাই রাখে। কিন্তু বিযাছুবর্গ (anti-magic square) ? যাছুবর্গের ঠিক উল্টো হলো বিযাছুবর্গ। সংখ্যাগুলো এমন ভাবে সাজাতে হবে যে ওপরে-নীচে, পাশাপাশি আর প্রধান ছুটি কর্ণ যোগ করলে কখখুনো এক যোগফল হবে না। শুনলে মনে হয়, এ আর এমন কি। সব দিকের যোগফল এক করাটাই সমস্যা। বিষম যোগফল তো হামেশাই বেরোবে। একবার করতে চেষ্টা করো। বুঝবে আটটা আলাদা যোগফল করতেও এলেম লাগে। দু-চারটে যোগফল কেমন যেন বিশ্বাসঘাতকতা করে এক হয়ে যায়।

একটা বিযাছুবর্গের নমুনা দি :

$$\begin{array}{ccccccc} 1 & \dots & 2 & \dots & 3 & & \\ & & & & \vdots & & \\ 8 & \dots & 9 & & 4 & & \\ & & \vdots & & \vdots & & \\ 7 & \dots & 6 & \dots & 5 & & \end{array}$$

1 থেকে 9 অবধি সংখ্যাগুলো পরপর সর্পিলাকারে (spiral) আকারে সাজানো হয়েছে। দাবা খেলার নোকোকে 1 থেকে চালাতে শুরু করলে ঠিক আইনমার্কি 9-এ গিয়ে পৌঁছবে। এর যে-কোনো সারির ও প্রধান দুটি কর্ণের (1-9-5, 3-9-7) যোগফল বিষম।

এ ছাড়া আর কোনো ভাবে তিন ঘরের বিযাছুবর্গ সাজাতে পারে? যাছুবর্গের মতো বিযাছুবর্গের ধরনও নেহাত কম না।

একই বিযাছুবর্গকে ঘুরিয়ে বা আয়নার সামনে ধরে যে বর্গ পাওয়া যাবে, সেগুলো কিন্তু আলাদা বলে ধরা হবে না।

## 23. পায়ে ধরে সাধা

গুপ্তধনের নেশা ডিটেকটিভ বইএর চেয়েও মারাত্মক। মৃত্যুঞ্জয় নাকে-কানে খং দিয়ে বলেছিল, আর কোনদিন গুপ্তধনের লোভ করবে না। কিন্তু মনটা কেমন যেন খুঁৎখুঁৎ করতে থাকে। আর কপালও তেমনি। একদিন রাগোদাল গ্রামে পৌঁছে আছে, সারা

গ্রামের লোক গালে হাত দিয়ে বসে আছে। গ্রামের সব জমি আল দিয়ে আলাদা করা, তবে প্রত্যেক জোতই লম্বায়-চওড়ায় সমান। এর কোনো একটা জোতে বিশেষ ডাকাতের গুপ্তধন পৌঁতা আছে—জোতটার তিনটে কোণ থেকে 2, 3 আর 4 মিটার দূরে। এখন কোন্ জোতটা যে বিশেষ ডাকাতের পছন্দ হয়েছিল, সেইটাই কেউ জানে না। আর হ্যাঁ, বলতে ভুলেই যাচ্ছিলুম, প্রত্যেক জোতই লম্বায়-চওড়ায় সমান, কিন্তু কোনো দুটো জোতই সমান লম্বা নয়।

মৃত্যুঞ্জয় গোটা ব্যাপারটা শুনলো। মুদির কাছ থেকে এক টুকরো খড়ি নিয়ে কী যেন অঁক কষলো। তারপর কোদাল দিয়ে একটা জোত কোপাতে শুরু করলো। সারা গ্রাম, মায় বেড়াল-কুকুরগুলোও, নিঃশ্বাস বন্ধ করে দাঁড়িয়ে আছে। মৃত্যুঞ্জয় কপালের ঘাম পুঁছলো। মাটি আর কেঁচো ছাড়া আর কিছুই ওঠে নি। চাপা হাসির আওয়াজের মধ্যে মৃত্যুঞ্জয় সেই জোতেরই আরেক দিকে কোদাল চালালো। খুকখুক আওয়াজ ছাপিয়ে শব্দ উঠলো—ঠং! ঘড়া ঘড়া মোহর! ভাগ্যবানের বোঝা, কথায় বলে, ভগবানে বয়। আটবারের জায়গায় মাত্র ছ বার খুঁড়েই গুপ্তধন পাওয়া গেলো।

কোন জমিতে বিশেষ ডাকাত মোহর পুঁতেছিল, মৃত্যুঞ্জয় সেটা বুঝলো কী করে?

## 24. দস্তুরমতো দরদস্তুর

সমর ধাড়াকে মনে আছে নিশ্চয়ই। সেই যে সেবার আমাদের সম্পাদকের মুণ্ডু চাই বলে ভয় দেখিয়ে চিঠি দিয়েছিল। ভদ্রলোককে (যদি ও-র'ম বিপজ্জনক লোককে আদৌ ভদ্রলোক বলা যায়) কেন ছেলেরা বাজার যাওয়ার সময় টানাটানি করে, তা সেদিন পষ্ট বুঝতে পারলুম। সেবার সারা পাড়া উজাড় করে সব পিকনিক করতে যাবে, ধাড়া মশায়ের দায়িত্ব পড়লো ডিম কেনার। গলদঘর্ম

হয়ে ফেরার পর সবাই তাঁকে ঘিরে বললো, কত সস্তায় কিনলেন দাদা? খাড়া মশায় ঠাণ্ডা গলায় বললেন, তা শ-এ এক টাকা কমিয়েচি। ব্যাপারটা কেউই বুঝতে পারলো না। খাড়া মশাইও তেমনি, যেন খুব বুঝিয়ে বলচেন এমন ভাব করে বললেন, তিরিশ টাকার মাল কিনে পাঁচটা বেশি হলো আর কি।

মাথামুণ্ডে কিছুই বুঝলুম না। তোমরা কিছু বুঝলে?

## 25. খল্লট অ্যাভিনিউ-এর ডাকপিয়ন

কার্ল গাউস (1777-1855) তখন পাঠশালায় পড়ে, বহুস আর্ট। গুরুমশায়ের বোধহয় বাইরে যাবার দরকার ছিল। তিনি বললেন, ছেলেরা শোনো। 1 থেকে 100 অবধি যোগ করে ছাখে যোগফলটা কত হয়। একবার হয়ে গেলে রিভাইস করবে। ছেলেরা তো দুই আর একে তিন, তিন আর তিনে ছয়—এই করে হিসেব করচে। কার্ল মহা ধুরন্ধর ছেলে, তার নজর পড়লো, 1 আর 100, 2 আর 99, 3 আর 98—এই ভাবে যোগ করলে 50 আর 51 পর্যন্ত পৌঁছে সব ক-টারই যোগফল হয় 101. তাহলে যোগফলটা নিশ্চয়ই নিশ্চয়ই হবে  $50 \times 101 = 5050$ . শোনা যায়, গুরুমশাই নিজেও জানতেন না, 1 থেকে 100 যোগ করলে কত হয়। ফলে, তাঁকে আবার যোগ করে দেখতে হলো কার্ল-এর উত্তরটা ঠিক হয়েছে কিনা।

গাউস-এর কায়দাটা কী ছিল? এইভাবে লিখলে বুঝতে আরো সুবিধে হবে।

$$S = 1 + 2 + 3 + \dots + 100$$

$$\begin{aligned} S &= 100 + 99 + 98 + \dots + 1 \\ 2S &= 100 (101) \end{aligned}$$

$$S = \frac{100 (1 + 100)}{2}$$



এখন যদি প্রথম সংখ্যাটা  $a$ , শেষ সংখ্যাটা  $l$ , আর এই শ্রেণীতে মোট যতগুলো সংখ্যা আছে (1 থেকে 100 মানে 100টা সংখ্যা)

তাকে  $n$  ধরি, তাহলে সূত্রটা দাঁড়ায় : 
$$S = \frac{n(a+l)}{2}$$

সূত্রটা যে কেবল স্বাভাবিক সংখ্যা, অর্থাৎ 1, 2, 3, 4, ... ইত্যাদি, যেখানে প্রত্যেক সংখ্যা তার আগের সংখ্যার চেয়ে 1 বেশি, তার ক্ষেত্রেই খাটবে এমন নয়। 4, 8, 12, 16, ..., 32 এর 'ম শ্রেণীর যোগফলও বার করা যাবে। এর বেলায় যোগফল হবে  $\frac{8(4+32)}{2} = 144$ .

4 আর 8, 8 আর 12, 12 আর 16—এদের সবার মধ্যকার তফাৎ হলো 4. তাহলে 32-এর ঠিক আগে, এই শ্রেণীর সপ্তম সংখ্যা হবে 28. আর 32-এর পরেও যদি এই শ্রেণীটা বাড়তে থাকে, তবে নবম সংখ্যা হবে 36.  $n$ -তম সংখ্যা বার করার সহজ উপায় হলো  $l = a + (n-1)d$  এই সূত্রটি মনে রাখা।  $n$ -তম (এখানে নবম) সংখ্যা  $l$  ধরলে,  $l = 4 + (9-1)4$ ,  $d$  মানে সাধারণ অন্তর বা Common difference. 28 আর 32-এর মধ্যে কোন্ সংখ্যা আছে? একটা শ্রেণী যদি  $a, x, b, \dots$  এই রকম হয়, তবে  $x$  হবে  $\frac{a+b}{2}$  যেমন  $\frac{28+36}{2} = 32$ .

এই ধরনের শ্রেণী, যাতে আগের সংখ্যার সঙ্গে একটা নির্দিষ্ট সংখ্যা যোগ করে-করে পরের সংখ্যাগুলো পাওয়া যায়, তাদের বলে সমান্তর প্রগতি (Arithmetical Progression). আর্যভট্টের বিখ্যাত বইটির দ্বিতীয় অধ্যায়ে ('গণিতপদ') সমান্তর প্রগতির যোগফল ( $S$ ) এবং পদের সংখ্যা ( $n$ ) বার করার সূত্রটি একটু অল্প চেহারায় দেয়া আছে। ফরাসি লেখক রোদে তার থেকে অনুমান করেছেন, দ্বিঘাত সমীকরণ (quadratic equation)-এর সমাধানও আর্যভট্টের জানা ছিল। ব্রহ্মগুপ্তের "ব্রহ্মসুত্ৰসিদ্ধান্ত" ও ভাস্করাচার্যের "লীলাবতী"-তেও এ-নিয়ম আলোচনা আছে।

চাঁনের পশ্চিম চ্যাং কিউ কিনও তাঁর বইতে হুরিটা দি. প্রগতির কথা লিখেছেন।

এবার তাহলে ধাঁধাটা দেখা যাক। ডাঃ খল্লট অ্যাভিনিউ-এর বাঁদিকের ফুটপাথের বাড়িগুলোর নম্বর জোড়, ডান দিকেরগুলো বিজোড়। এক পিয়ন চিঠি বিলি করতে বেরিয়েছেন। বাঁ ফুটপাথে পা দেয়া মাত্র পাড়ার ছেলেরা এসে ছেকে ধরলো : আমার বন্ধুর দাদার বিয়ের নেমস্তনের চিঠি এসেছে? আমার 'ধাঁধা' কোথায়? - এর'ম হাজার প্রশ্ন। পিয়নটি তাদের হাত এড়িয়ে 12 নম্বর বাড়ির সামনে দাঁড়িয়ে ছাখেন, তাঁর বাঁহাতের বাড়িগুলোর নম্বর যোগ করলে ডান দিকের দুটো বাড়ির নম্বরের যোগফলের সমান হয়। অর্থাৎ তাঁর বাঁদিকে রয়েছে 2, 4, 6, 8 আর 10 নম্বর বাড়ি, আর ডান দিকে রয়েছে 14 আর 16 নম্বর বাড়ি। 70 নম্বর বাড়ির সামনে পৌঁছে ছাখেন, ব্যাপারটা আবার তাই হয়েছে। তবে ডান দিকের বাড়ির সংখ্যা স্বভাবতই বেড়ে চোদো হয়ে গ্যাছে। চিঠি বিলি করতে করতে পিয়নটি অনেক দূর চলে গেস্লেন। এখন একটা বাড়ির সামনে দাঁড়িয়ে দেখলেন, এবারে বাঁদিকে যতগুলো বাড়ি আছে তাদের নম্বরের যোগফল ডানদিকের সব ক-টা বাড়ির নম্বরের যোগফলের সমান। তাহলে বাঁ ফুটপাথে মোট ক-টা বাড়ি ছিল?

আর, পিয়নটি যখন বিজোড় নম্বরওলা ফুটপাথে যাবেন তখনই বা কোন্ কোন্ বাড়ির তলায় দাঁড়িয়ে তিনি ঐ রকম বাঁ হাত-ডান হাতের হিসেব মেলাতে পারবেন?

## 26. দুঃসাহসিক ভ্রমণকাহিনী

পৃথিবীর সবচেয়ে আনাড়ি গাড়োয়ানের সঙ্গে চলেছি। গম্বুয কাটাছেঁড়া থেকে ফাটাজোড়া। ছইএর ভেতর বসে থেকে বাতের চিকিচ্ছে হয়ে যাচ্ছে। শুধু দুঃখ একটাই, আমার বাত নেই। গলা

তুলে বলল, <sup>দি প্রথম</sup> গায়ান সাব, তোমার গরুছুটো কি, আর কোনো কদমে চলতে জানে না ? গাড়োয়ান বললেন, কেন জানবে না কত্তা । তবে আরেকটু আস্তে যাবে এই আর কি । ওরে বাবা, তাহলে আর আজকে পৌঁছতে হবে না ।

দূরে একটা গ্রাম দেখে প্রায় পেটের দায়েই জিগেস করলুম, কত্তা, ওই গাঁয়ের নামটা যেন কী ? গাড়োয়ান বললেন, ডাবের ছড়াছড়ি ও গাঁয়ে, নাম কানাখোঁড়া । ষড়িতে দেখলুম, কাটাছেঁড়া থেকে পনেরো মিনিট আগে বেরিয়েছি । জিগেস কবলুম, কানাখোঁড়া আর কদ্দুর ? গাড়োয়ান বললেন, তা কত্তা যদ্দুর এয়েচেন তাথেকে তিনগুণ দূর হবে । কানাখোঁড়ায় ডাব-টাব খেয়ে আবার তো চললুম । মোট তেরশ গজ যাবার পর কাতর হয়ে বললুম, ফাটাজোড়া আর কদ্দুর বাবা ? আর তো পারি না । গাড়োয়ানকে তখন কানাখোঁড়ায় পেয়েচে । বললেন, এজ্ঞে, কানাখোঁড়া থেকে যদ্দুর এয়েচি তাঁর মস্তর তিনগুণ দূরে ।

কোনো রকমে পৈতৃক প্রাণটুকু বাঁচিয়ে, পঁয়তাল্লিশ মিনিট বাদে, কোমরে হাত দিয়ে শেষে ফাটাজোড়ায় এসে নাবলুম । মানে গাড়োয়ানই চ্যাংদোলা করে নাবিয়ে দিলো ! কতটা পথ পার হলুম বলো তো ?

## 27. জন্মদিনের কেক

ছেলের হাতে ছুরিটা তুলে দিয়ে ব্যারন মুনচাউসেন বললেন, পাউল, চারটের বেশি কোপ মারবে না, এটাকে যত বেশি পারো টুকরো করে ফ্যালো ।

পাউলের আজ জন্মদিন । পেপ্পায় একখানা গোল কেক রয়েছে । এক ফুঁয়ে পাউল ন-টা মোমবাতিই নিবিয়ে দিয়েচে । তারপরেই ব্যারনের এই অদ্ভুত আবদার ।

ছেলেটা বোকা হলে কি হবে, বুদ্ধি আছে। ছুরিটা দিয়ে ঘ্যাচ ঘ্যাচ করে চারটে কোপ মারলো। বারান টুকরোগুলো গুনে বললেন, ঠিক আছে। পাউলের মাস্টারমশাই গম্ভীর গলায় বললেন, ছুরিটা রাখো। এবার কেকের দিকে না-তাকিয়ে বলো, পাঁচটা, ছটা, সাতটা কোপে সবচেয়ে বেশি কতগুলো টুকরো পাওয়া সম্ভব? পাউল এটার কোনো উত্তর দিতে পারলো না। কিন্তু, বুদ্ধিমান পাঠক, তুমি কি বলতে পারো পাউল কী ভাবে কেকটা কেটেছিল, আর মাস্টারমশায়ের প্রশ্নের উত্তরটাই বা কী হবে? অর্থাৎ, n-সংখ্যক কোপে সব চেয়ে বেশি কতগুলো টুকরো পাওয়া যায়?

## 28. হবুচন্দ্র রাজার গোলটেবিল

হবুচন্দ্র রাজার গোলটেবিল বৈঠকে প্রত্যেক লোকের হাতেই কোনো-না-কোনো প্রস্তাব লেখা কাগজ আছে। হবুচন্দ্র রাজার ডানদিকে আছেন গবুচন্দ্র মন্ত্রী। তাঁর হাতের কাগজের সংখ্যা রাজার তুলনায় একটা কম, যদিও তাঁর ডানদিকে বসা কোতোয়ালের তুলনায় একটা বেশি। তাঁর পরের প্রত্যেকের অবস্থাই অবশ্য তাই: বাঁ হাতের লোকের চেয়ে একটা কম প্রস্তাব, ডান হাতের চেয়ে একটা বেশি। হবুচন্দ্র তাঁর প্রস্তাবগুলোর মধ্যে থেকে একটা গবুচন্দ্রকে দিলেন। গবুচন্দ্র সেটা দেখে নিয়ে পাশের কোতোয়ালকে দিলেন, সেই সঙ্গে নিজের একটা প্রস্তাবও গুঁজে দিলেন। কোতোয়াল আবার ঐ প্রস্তাব দুটো আর নিজের একটা, অর্থাৎ তিনটে প্রস্তাব দিলেন তাঁর ডান দিকে বসা বিদূষককে। যতক্ষণ পর্যন্ত না কারুর হাত খালি হচ্ছে, ততক্ষণ এইভাবে কাগজ দেয়া-নেয়া চলতে থাকলো। একজনের হাত খালি হতেই কাগজ চালাচালি বন্ধ। তখন হিসেব করে ছাখা গেলো, গোলটেবিলে উপস্থিত একজনের হাতের কাগজের সংখ্যা তাঁর পাশের লোকের তুলনায় চারগুণ।

এখন বলো, মোট ক-টা প্রস্তাব ছিল? আর, বৈঠকীই বা ক-জন?

## 29. বিভাজ্যতা

এনট্রোপে সত্যেন বোস অংক-য় একশ-র মধ্যে একশ পেলেন না কেন? “পরীক্ষার খাতা জমা দিয়া সত্যেন্দ্রনাথ আসিলেন হিন্দু স্কুলে, বঙ্গী মহাশয় [ স্কুলের ‘বিজ্ঞান পাগল গণিতশিক্ষক’ উপেন্দ্রলাল বঙ্গী ] তার অপেক্ষায় আছেন। প্রশ্নপত্র হাতে রাখিয়া ছুজনে মুখে মুখে অঙ্কগুলি কষিয়া যাইতে লাগিলেন। হঠাৎ দেখা গেল একটি অঙ্কে সত্যেন্দ্রনাথ 117কে আর ভাঙেন নাই, অবিভাজ্য ভাবিয়া। বঙ্গী মহাশয় বলিলেন—ন তেরম্? ছ-জনেরই মুখ অঙ্ককার হইয়া গেল।”

(নীরেন্দ্রনাথ রায়, বিজ্ঞানার্চ্যের হৃদয়বস্তা, “পরিচয়”, পৌষ, 1370, পৃ 852)

তাহলে বিভাজ্যতা ব্যাপারটা খুবই দরকারি। 7কে 2 দিয়ে ভাগ করলে পড়ে থাকে পেন্সিল, মানে 1. 6কে 2 দিয়ে ভাগ করলে কোনো ভাগশেষ থাকবে না। অর্থাৎ 6 দিবি 2 দিয়ে বিভাজ্য। সংক্ষেপে 2|6.

এখন, কোনো সংখ্যা যে অন্য একটি সংখ্যা দিয়ে বিভাজ্য সেটা এক নজরে বলব কী করে? ভাগ করে? অদ্ভুত! ভাগ করে দেখে বলব, ভাগ করা যায় কিনা? ডিমটা ভেঙে তবে বলব পচা না ভালো! তোমার মা-কে অত ঝামেলা করতে হয় না, এক নজরে বুঝে নেন। তেমনি, কোনো সংখ্যা ( ধরা যাক 1235813 ) 2,3,4,5,..., 9 দিয়ে বিভাজ্য কিনা জিগেস করলে সব ক-টা ভাগ করে বলতে কত সময় লাগবে? অবশ্য সোমেশ বসু বা শকুন্তলা দেবী হলে অন্য কথা।

বিভাজ্যতার সমস্যা সমাধানের জন্মে কয়েকটা সহজ নিয়ম আছে, ইংরিজিতে যাকে বলে rule of thumb. যেমন :

1. সব সংখ্যাই, বলাই বাহুল্য, 1 দিয়ে বিভাজ্য।
2. যদি কোনো সংখ্যার শেষ অংকটা জোড় হয়, তবে সেটি 2 দিয়ে বিভাজ্য। মনে রেখো, শূন্যও জোড় সংখ্যা।
3. যদি কোনো সংখ্যার সংখ্যামূল 3, 6 বা 9 হয়, তবে সেটি 3 দিয়ে বিভাজ্য। যদি কোনো সংখ্যার সংখ্যামূল 5 হয়, তবে সংখ্যাটিকে 3 দিয়ে ভাগ করলে ভাগশেষ হবে 2.
4. কোনো সংখ্যার শেষ ছুটো অংক যদি 4-এর নামতার আওতায় পড়ে, তবে সেটি 4 দিয়ে বিভাজ্য।
5. কোন সংখ্যার শেষে 5 বা 0 থাকলে সেটি 5 দিয়ে বিভাজ্য।
6. কোনো সংখ্যা যদি জোড় হয়, আর তার সংখ্যামূল যদি 3 দিয়ে বিভাজ্য হয়, তবে সেটি 6 দিয়ে বিভাজ্য। বুঝতেই পারচ, 6 মানে  $2 \times 3$ , সুতরাং 2 আর 3-এর বিভাজ্যতার নিয়ম এক সঙ্গে খাটালেই হলো।
7. এটা একটু ঝামেলার। তবে ছ-অংকওয়া সংখ্যার (যেমন, 873378) বেলায় সংখ্যাটাকে 873873 থেকে বিয়োগ করো। বিয়োগফল যদি 7 দিয়ে বিভাজ্য হয়, তবে সংখ্যাটাও 7 দিয়ে বিভাজ্য হবে। যদি না হয়, হবে না। (হঠাৎ 873873 নিলুম কেন বলতে পারো ?)
8. কোনো সংখ্যার শেষ তিনটি অংক যদি 8-এর নামতার আওতায় আসে, তবে সেটি 8 দিয়ে বিভাজ্য।
9. কোনো সংখ্যার সংখ্যামূল যদি 9 দিয়ে বিভাজ্য হয়, তবে সংখ্যাটিও 9 দিয়ে বিভাজ্য।
10. 10-এর নিয়মটাও কি বলতে হবে ? সংখ্যাটার শেষে 0 থাকলেই দশের দশা।


7, 11 আর 13-র বেলায় আরো সুন্দর একটা নিয়ম আছে। সংখ্যাটা যদি ছ-অংকের বেশি (বা কমও) হয় তাহলেও দিবি বিভাজ্যতা বার করা যাবে। ডান দিকের তিনটে করে সংখ্যার একটা দল নিয়ে একবার বিয়োগ আরেকবার যোগ করে চলো। এবার ঢাংখো উত্তরটা 7 বা 11 বা 13 দিয়ে বিভাজ্য কিনা।

ধরো 78362494.  $494 - 362 + 78 = 210$ , এটি 7 দিয়ে বিভাজ্য (10 দিয়েও), 11 বা 13 দিয়ে নয়। সুতরাং মূল সংখ্যাটাও 7 দিয়ে বিভাজ্য, 11 বা 13 দিয়ে নয়। বিয়োগফল যদি 0 হয়, তাহলে মূল সংখ্যাটা 7, 11, 13 তিনটে দিয়েই বিভাজ্য।

11-র ক্ষেত্রে আরেকটা কৌশল আছে। প্রত্যেকটা অংককে বিয়োগ-যোগ করে চলো। উত্তরটা যেই 11-র নামতার আঙত্যয় পড়লো, সংখ্যাটাও 11 দিয়ে বিভাজ্য। 647152 কে লেখা হবে  $6 - 4 + 7 - 1 + 5 - 2 = 11$ , কাজেই— এটা কেন হয় বলতে পারো? আর বলো তো, 0 আন 1 দিয়ে তৈরি সব চেয়ে ছোটো কোন সংখ্যা 72 দিয়ে বিভাজ্য?

### 30. উড়নচণ্ডীতলা হাউসিং এস্টেট

উড়নচণ্ডীতলায় নতুন হাউসিং এস্টেট নিয়ে সে যে কী ঝামেলা কী ঝগড়াট কী বলব। খবরের কাগজে চিঠি লেখালেখি, কর্তাদের মুণ্ডপাত (অবশ্য কথায়), বিধানসভায়-লোকসভায় জোর প্রশ্নোত্তর—কিছু বাদ যায় নি। এখনো বোধহয় সুপ্রিম কোর্টে মামলা বুলচে।



বাপারটা হয়েছিল এই : উড়নচণ্ডীতলায় জমিটা ছিল চতুষ্কোণ, প্রত্যেকটা দিক পৌনে এক মাইল লম্বা। বাড়ি ঘর তৈরি হবে কেবল কালো দাগকাটা ছোটো ত্রিকোণ এলাকায়। মধ্যের পুরো এলাকায় থাকবে বারোয়ারি ক্ষেত। আলু পটল উচ্ছে টাড়াসের চাষ হবে, আর তার ঠিক মধ্যে দিয়ে পূর্ব থেকে পশ্চিমে চলে যাবে একটা পাকা রাস্তা। ক্ষেতের জন্যে এতটা জমি বরাদ্দ করা নিয়েই অত হল্লা হয়েছিল। ক্ষেতের এলাকাটা সত্যিই নেহাত কম ছিল না, পুরো এস্টেটের এলাকার সাতের বারো ভাগ! মধ্যের রাস্তাটার দৈর্ঘ্য তাহলে কত ছিল ?


### 31. বাজার করার হাজার ঠালা

অলীকবাবু সেদিন ওল্ডমার্কেটে গিয়ে কিছু কমলানেবু কিনলেন। একটা ছোটো নয়, কমলানেবুর সংখ্যা 1000 থেকে 9999 এর মধ্যে। প্রত্যেকটা নেবুর দাম : কয়েক আনা, কয়েক পাই (1 আনা = 12 পাই)। তারপর তিনি কিছু আপেলও কিনলেন। আপেলের সংখ্যা হলো কমলানেবুর সংখ্যার সহস্রের অংকটা বাদ দিলে যত হয় তত। আবার, একটা আপেলের দাম হলো নেবুর দামের ঠিক উল্টো। অর্থাৎ কমলানেবুর দাম যত আনা, আপেলের দাম তত পাই, ওটার যত পাই, এটার তত আনা। বুঝতে অসুবিধে হচ্ছে ? আচ্ছা। কমলানেবুর দাম  $x$  আনা  $y$  পাই হলে, আপেলের দাম  $y$  আনা  $x$  পাই। কিন্তু কী আশ্চর্য! অলীকবাবু অবাক হয়ে দেখলেন, মোট কমলানেবুর দাম আপেলগুলোর দামের সমান। কমলানেবুই বা ক-টা ছিল, আর এক-একটা কমলানেবুর দামই বা কত ছিল ?



## 32. চৌপোলজি


ক্যোনিগ্‌সবার্গ, প্রুশিয়া—প্রুগেল নদীর তীরে, বেঞ্চিতে বসে গালে হাত দিয়ে ভাবছিলেন হের ক্লুগ। নদীটা বয়ে যাবার পথে দু-ভাগ হয়ে একটা দ্বীপ তৈরি করেছে। পারাপারের জন্তে রয়েছে সাতটা সেতু। হের ক্লুগ ভাবছিলেন: কোনোটার ওপর দিয়ে ছবার না গিয়ে সাতটা সেতুই কি পার হওয়া সম্ভব?



ক্লুগ অনেক ভাবলেন। কোনো সুরাহা হলো না। হঠাৎ মনে পড়লো লেওনহার্ড্‌ অয়লার-এর কথা। অয়লার তাঁর বন্ধু, বাঘা অংকবিদ। ছাখা যাক এ ব্যাপারটায় কিছু করতে পারে কিনা। সমস্তুটা শুনে এক টিপ নসি়া নিয়ে অয়লার বললেন, হুঁ। তারপর খসখস করে নদীর পথ, দ্বীপ ও সেতুগুলোর নকশা এঁকে ফেললেন। নিজের মনেই তিনি বললেন, ধরা যাক, নদী দিয়ে ভাগ করা চারটে স্থলভূমি হলো A, B, C, D; আর সেতুগুলোর নাম a, b, c, d, e, f, g. A থেকে B-তে a অথবা b সেতু দিয়ে যাওয়া যাবে। এই যাওয়ার পথের নাম দেয়া যাক AB. B থেকে D-তে যেতে হলে f সেতু, তার নাম তাহলে BD. আর এই পথে A থেকে B, B থেকে D-তে যাওয়ার পথের নাম হবে ABD. সেখান থেকে আবার C-তে গেলে ABCD, কেমন তো? ক্লুগ আগেই ভেবে-

ছিলেন যে এই পথে যেতে হলে তিনটে সেতু পার হতেই হবে, আর তা লিখতে চারটে অক্ষর লাগবে। সুতরাং সাতটা সেতু একবার ঘুরে এলে পথটা লিখতে হবে আটটা অক্ষরে। তিনি চুপচাপ ঘাড় নাড়লেন।

অয়লার বলে চললেন, কিন্তু যাওয়া-আসার সেতুর দিকে একদম নজর দেয়া হয় নি। A ও B-র মধ্যে ছোটো সেতু আছে, সুতরাং AB ( বা BA ), AC ( বা CA )—দুবার, BD আর DC একবার থাকবে। হঠাৎ তাঁর কী খেয়াল হলো, বললেন, আচ্ছা, ধরা যাক A এমন একটা জায়গা যেখান থেকে বেরোবার অনেক সেতু, যেমন a, b, c, d ইত্যাদি, আছে। শুধু a পার হলে বুঝতে হবে হয় আমি A-তে ছিলাম, নয় a পার হয়ে সব A-তে এসে পৌঁছেছি। সুতরাং



a পার হলে শুধু A লেখাই যথেষ্ট। যদি A-তে আসা-যাওয়ার তিনটে সেতু থাকে এবং আমি তিনটেই পার হই তবে যাওয়ার পথ ঠাখাতে হলে দুবার A লিখতে হয়, সে A থেকেই শুরু করি আর A-তে এসেই পৌঁছই। A থেকে যাওয়া-আসার জন্তে পাঁচটা সেতু থাকলে তিনবার A লিখতে হবে। তাহলে, একগাল হেসে অয়লার বললেন, সেতুর সংখ্যা যদি বিজোড় হয়, তবে তার সঙ্গে এক যোগ করে দুই দিয়ে ভাগ করলে যাওয়ার পথে A ক-বার লিখতে হবে জানা যাবে। আর আমাদের প্রেগেল নদীর ব্যাপারটা দাঁড়ালো এই: A-র সঙ্গে পাঁচটা সেতুর যোগাযোগ, সুতরাং A লিখতে হবে তিনবার। সেরকম B, C, D থাকবে দুবার। তা'লেই বুঝলে, সাতটা সেতু একবার করে পার হতে ন-টা অক্ষর লাগে। সুতরাং বুঝা চেষ্টা, এক টিলে সাতটা পাখি মারা যায় না।



মধ্যকার রেলপথের ছবি দেয়া আছে। প্রত্যেক পথে একবার মাত্র গিয়ে সব ক-টা শহর ঘুরে আসতে পারবে? যে-কোনো শহর থেকে শুরু করে যে-কোনো শহরে এসে থামতে পারো।

### 33. পৃথিবীর সূত্রবলয়

বিশ্বামিত্র একবার রেগে গিয়ে ব্রহ্মার সঙ্গে পাল্লা দিয়ে নতুন জগৎ তৈরি করতে নাবলেন। প্রথমেই তাঁর লক্ষ্য হলো একটা আগাপাসতলা নতুন পৃথিবী তৈরি করা। বিরাট লম্বা এক দড়ি নিয়ে লাগলেন মাপজোক করতে। বিম্বরেখা বরাবর দড়িটা পেঁচিয়ে যখন দুটো মুখ এক করতে গ্যাচেন—তখন মহা মুশকিল। পুরোটা বেড় দিয়ে দড়িটার একটা মুখ একগজ বাড়তি রয়ে গ্যাচে। দড়ির দুটো মুখ এক করে তখন তিনি বিম্বরেখার সঙ্গে সমান্তরাল এক সূত্রবলয় তৈরি করলেন। দূর থেকে দেখলে মনে হবে যেন দ্বিতীয় শনি গ্রহ।

পাশে দাঁড়িয়ে সমস্ত ব্যাপারটা দেখছিল ময়দানব। বিশ্বামিত্র এক ধমক মেরে বললেন, ফ্যাচফ্যাচ করে হাসছিস্ যে বড়ো? বলতো, পৃথিবী থেকে আমার এই সূত্রবলয়ের ব্যবধান কত? ময়দানব শুক্রাচার্যের কাছে অংক শিখেছিল। উত্তর দিতে তার সময় লাগলো মাস্তুর তিন অনুপল।

তোমাদেরো তার বেশি সময় লাগার কারণ নেই।

### 34. নোস্তার বুদ্ধি

আমাদের পাড়ার শ্রীমান্ নোস্তা সবে সাত পুরে আটে পড়েছে, কিন্তু বুদ্ধিতে ব্যাটা বৃহস্পতি। সেদিন ইস্কুল থেকে ফিরে মাঠে গ্যাচে ঢেঁকুচকুচ চড়তে। কিন্তু মাঠে একটা ছেলে নেই যাকে অগ্নাদিকে বসাবে। ঢেঁকুচকুচটার একটা দিক আবার গ্যাচে ভেঙে। কিন্তু

দমে যাবার ছেলে নোস্তা নয়। এদিক-ওদিক তাকিয়ে আছে, মাঠের ধারেই একটা নতুন বাড়ি তৈরি হচ্ছে। এক পাজা ইঁট রয়েছে। দেখে শুনে নোস্তা আঠারোটা ইঁট নিয়ে এলো। যখন সেগুলোকে ঢেঁকুচকুচের ভাঙা দিকটায় রাখে তখন ব্যালেন্স করার জন্তে সব ক-টাই দরকার। লম্বা দিকটাতে অবশ্য আটটা রাখাই যথেষ্ট। একটা ইঁটের ওজন যদি পৌনে একটা ইঁট আর পৌনে এক কে.জি-র আদ্বৈকের সমান হয় তবে নোস্তার ওজন কত ?

### 35. হ য ব র ল-র বিচারসভা

আসামা ন্যাড়ার পিঠে মোটা বইটা দিয়ে খাবড়া মারতে মারতে শেয়াল বললো, দাঁড়াও, জেরার চোটে সব ফাঁস করে দিচ্ছি। বলে কনস্টেবল খরগোশকে বললে, তুমি বলচ যখন তুমি ছুটতে আরম্ভ করলে আসামী তখন তোমার থেকে সাতাশ পা দূরে ছিল ?

—হ্যাঁ।

—এবং তুমি শপথ করে বলতে রাজি আচ যে তুমি পাঁচ পা গেলে সে আট পা যায় ?

—ঠিক তাই।

—তাহলে তুমি তাকে ধরলে কী করে ? এয়ার্কির জায়গা পাওনি।

—দেখুন, ব্যাপারটা বুঝছেন না। আমার লাফগুলো ওর থেকে লম্বা। আমার ছ পা যাওয়া মানে আসামীর ছোটায় পাঁচ পা। এখন একটু খেয়াল করলেই বুঝবেন, ক-পা গেলে ঠিক যে জায়গায় আসামীকে পাকড়েছি সেখানে পৌঁছনো যায়।

হাকিম প্যাঁচা চোখটা খুলে একটু হিসেব করে নিয়ে বললো, ঠিক আছে। আসামীর তিনমাস জেল আর সাতদিন ফাঁসির হুকুম হলো।

খরগোশ কি সত্যিকথা বলেছিল ?

### 36. স্বম্পাতম দূরত্ব

সরলরেখায় বয়ে চলেচে বিশীর্ণা নদী। তীর থেকে 3 গজ দূবে A বিন্দুতে বসেছিলেন ভাস্করাচার্য ( জুনিয়র )। হঠাৎ নজরে পড়লো তীর থেকে 6 গজ দূরে B বিন্দুতে একটা বাড়িতে আগুন লেগেচে। A থেকে B-র দূরত্ব সোজাসুজি 5 গজ। ভাগ্য ভালো, হাতের কাছেই বালতি ছিল। সোজা ছুটলেন নদী থেকে জল নিয়ে। অংকটা জানতেন বলে রক্ষে, স্বল্পতম দূরত্বটুকু মনে-মনে কষে তাড়াতাড়ি পৌছে জল ঢালতে লেগে গেলেন।

ভাস্করাচার্য ( জু ) কতটা ছুটেছিলেন ?


### 37. পাঁচে বহুতল ছয়ে গ্রহ

খ্রীষ্টপূর্ব পঞ্চম শতাব্দীর গ্রীক দার্শনিক প্লাতোন ( ইংরেজরা যাকে প্লেটো বলে ) ভেবেছিলেন, ঈশ্বর হলেন পয়লা নম্বরের জ্যামিতিবিদ। ফলে তাঁর সৃষ্টির পথে ছড়ানো রয়েছে শুধু সুষমা আর সামঞ্জস্য। কোপার্নিকাস, গ্যালিলিও আর নিউটন এর মধ্যে যিনি সাক্ষাৎ হাওড়া ব্রিজ, সেই ইওহানেস কেপলার ( 1571-1630 ) এ-ব্যাপারটা এতই বিশ্বাস করতেন যে প্লাতোন-এর “তিমায়েউস”-এ যে পাঁচটি সুষম বহুতলের ( regular polyhedra ) কথা আছে, তাদের সঙ্গে সৌর মণ্ডলের ছ-টি গ্রহের ( ইউরেনস, নেপচুন আর প্লুটোর তখনো অবধি হ’দিশ মেলে নি ) আয়তনের তিনি একটা সম্পর্ক খুঁজে বার করলেন। শনির গোলকটা যদি একটা লুডোর ছকার চারধারে পরিলিখিত (circumscribed) হয়, যার ভেতরে রয়েছে বৃহস্পতির গোলক, আর বৃহস্পতির গোলকের ঠিক ভেতরে যদি একটা পিরামিড থাকে, যার মধ্যে অন্তর্লিখিত ( inscribed ) রয়েছে মঙ্গলের গোলক, এবং এইভাবে আর তিনটি বহুতলের ভেতরে ও বাইরে আর তিনটি গ্রহের গোলক থাকে, তবে গ্রহগুলির আয়তন

সম্পর্কে কোপার্নিকাস-এর হিসেব ঠিক বলে প্রমাণ করা যাবে। এই জগ্রেই গ্রহের সংখ্যা ছয়, আর সেগুলো পরের পর ঐ ভাবে সাজানো আছে। “ব্রহ্মাণ্ডের রহস্য”তে একথা বলার কুড়ি বছর াদে, “জগতের সামঞ্জস্য” বইটিতে তাঁর বিখ্যাত তৃতীয় সূত্রটি বলার সময়েও কেপলার একটু ঘুরিয়ে এই বিচিত্র প্রমাণ (?) -টি দিয়েছিলেন। বুঝতেই পারচ, কত গভীর ছিল সুখম বহুতলের টান :

সুখম বহুতল জিনিসটা কী ? লুডোর ছক্কাটার কথাই ভাবো। এর প্রত্যেকটা পিঠই একটা করে বর্গক্ষেত্র, ছ-টি পিঠে বর্গক্ষেত্র রয়েছে, যার অন্তঃকোণগুলি সমান। সুখম বহুতল তাকেই বলা হবে যার প্রত্যেকটি পিঠে সমান সংখ্যক বাহু ও শীর্ষ রয়েছে। অন্য কথায়, সমান দৈর্ঘ্য ও প্রস্থের সরল রেখা দিয়ে দু-মাত্রায় যেমন সুখম বহুভুজ আঁকা যায়, তেমনি তিনমাত্রায় সুখম বহুতলও তৈরি করা যায়।

এখন মজাটা হলো, সুখম বহুভুজের সংখ্যার কোনো সীমা-পরি-সীমা নেই। সমবাহু ত্রিভুজ, বর্গক্ষেত্র, সুখম পঞ্চভুজ, অষ্টভুজ, বিংশ-ভুজ, সহস্রভুজ আঁকা সম্ভব। কিন্তু সুখম বহুতল বা সমঘন (regular solids)-এর সংখ্যা বড়োই কম। কেপলার-এর আমল পর্যন্ত লোকে পাঁচটির কথা জানতো। সেগুলো হলো :



1. ষট্‌তল ( Hexahedron বা cube )
2. চতুস্তল ( Tetrahedron বা pyramid )
3. দ্বাদশতল ( Dodecahedron )
4. বিংশতল ( Icosahedron )
5. অষ্টতল ( Octahedron )

ফরাসি দার্শনিক-অংকবিদ্ দেকার্ত এদের শীর্ষ ( vertex ), ধার ( edge ) ও পিঠ ( face ) গুলির মধ্যে একটা সম্পর্ক প্রথম লক্ষ করেন, পরে লেওনহার্ড্ অয়লার তার প্রমাণটাও দান । ব্যাপারটা হলো এই যে, পাঁচটা বহুতলের শীর্ষ ও পিঠের সংখ্যা ধারের সংখ্যার চেয়ে দুই বেশি । অর্থাৎ  $V + F = E + 2$ . নিচের হিসেবটা দ্যাখো :

নাম	V	E	F	V + F	E + 2
	শীর্ষের সংখ্যা	ধারের সংখ্যা	পিঠের সংখ্যা		
চতুস্তল	4	6	4	8	8
ষট্‌তল	8	12	6	14	14
অষ্টতল	6	12	8	14	14
বিংশতল	12	30	20	32	32
দ্বাদশতল	20	30	12	32	32

এই ফাঁকে একটা কথা বললো নি । এই পাঁচটা সুষম বহুতলের সঙ্গে কেপলার আরো দুটো যোগ করেছিলেন : তারার মতো দেখতে দুটি দ্বাদশতল ( ছোটোটির  $F=12, V=12, E=30$  ; বড়োটির  $F=12, V=20, E=30$  ) । পরে পোয়াঁসো ( 1777-1859 ) আরো দুটো সুষম বহুতলের কথা বললেন : বৃহৎ বিংশতল ( $F=20, V=12, E=30$ ) আর বৃহৎ দ্বাদশতল ( $F=12, V=12, E=30$ ) । এই নতুন চারটির মধ্যে দুটি অয়লার-এর উপপাত্তের সঙ্গে মেলে, দুটি মেলে না । ক্যাণ্ডি ও রলেট-এর “ম্যাথামেটিক্যাল মডেল্‌স্” ( অক্সফোর্ড, 1964 ) বইটিতে এই সব ক-টার ছবিই দেখতে পাবে ।


সুষম বহুতলের সংখ্যা তাহলে দাঁড়ালো 9, আর আমাদের সৌরজগতের ন-টা গ্রহ যুগে চলেচে । গ্রহগুলির আয়তন সম্পর্কে কেপলার যে-হিসেবটা করেছিলেন, সেটার মধ্যে কুসংস্কারের ছাপ




ছিল ঠিকই। কিন্তু শেষ পর্যন্ত সংখ্যার সামঞ্জস্যটা রয়েই গেলো, আর কেপলারই তার গোড়াপত্তন করে গেলেন!

এত জ্ঞানের কথা কেন বললুম? সহজ কথা, কাগজ দিয়ে সুষম বহুতল তৈরি করব বলে। সহজ জিনিস দিয়েই শুরু করা যাক। একটা চতুস্তল বা পিরামিড খাড়া করা যাক।

একটা খাম জোগাড় করো। তার ছপিঠেই দুটো সমবাহু ত্রিভুজ এঁকে নাও। তারপর ছবিতে যেমন ছাখানো আছে তেমনি ভাবে স্ট্যাম্প-মারা অংশটুকু ছিঁড়ে নাও। বাস, এবার দুটো কোণ (A আর B) বাহু বরাবর এক করো, সুন্দর পিরামিড পেয়ে যাবে। ছেঁড়া দিকটা আঠা বা পিন বা সেলোটেক দিয়ে আটকে দাও।



আরেকটা ব্যাপার একটু চেষ্টা করে ছাখো। একটা চতুষ্কোণ (বর্গক্ষেত্র) কাগজ নাও, তাতে দুটো ভাঁজ দিয়ে একবার কেটে তার থেকে একটা চতুস্তল বানাও তো।



লুডোর ছকা হিসাবে ষট্‌তলের ব্যবহার হয়ে থাকে (অবশ্য পাঁচটি

সুখম বাহতলই কোনো-না-কোনো খেলায় লাগানো হয়েছে )। এখন একটা 1 ইঞ্চি চওড়া যত ইচ্ছে লম্বা কাগজ ভাঁজ করে যদি ছক্কা বানাতে হয় তবে কাগজটাকে কমপক্ষে ক-টা বর্গক্ষেত্রে ভাগ করবে ? এটা ঠিক করতে পারলে ছক্কা তৈরি করতে আর কোনো ঝামেলা হবে না ।

### 38. কাটাকুটি

বাঙালীর ছেলেকে কাটাকুটি খেলা শেখাতে হয় না। বলা যায়, জন্ম থেকেই খেলাটা তার জ্ঞান। একটা বয়েস পর্যন্ত, ধরা বাক বারো বছর, সব ছেলেই এ খেলাটা অগাধ উৎসাহে খেলে চলে। তারপর আস্তে আস্তে মজা চলে যায়। একটু ঠাণ্ডা মাথায় খেললে আর হারজিৎ থাকে না, শুধুই ড্র হয়।

কাটাকুটিকে ইংরিজিতে বলে Ticktacktoe. তবে এ-খেলা অনেক দিনের পুরনো। যিশুখ্রীস্টের জন্মের অনেক শ বছর আগে থেকেই চীন, গ্রীস, রোমে এ-খেলা চালু ছিল, যদিও তার কায়দা ছিল আলাদা। প্রত্যেক খেলোয়াড় তিনটে করে ঘুঁটি নিয়ে বসতো। এক-একবার এক-একজন এক-এক ঘরে একটা করে ঘুঁটি বা পয়সা বসাবে। যেই কেউ এক লাইনে লম্বালম্বি, আড়াআড়ি বা কোণাকুনি তার ঘুঁটি বসাতে পারবে, তার জিৎ। যদি কেউই তা না-করতেপারে,

1	2	2
1		
2	1	

1 প্রথম খেলোয়াড়ের ঘুঁটি, 2 দ্বিতীয় খেলোয়াড়ের

তাতেও কিছু এসে যায় না। খেলাটা চলতেই থাকবে, গায়ে লাগা

ফাঁকা ঘরে ঘুঁটি সরিয়ে এক লাইনে আনার চেষ্টা করতে হবে। তবে কোণাকুণি ঘুঁটি সরানো চলবে না, শুধু পাশাপাশি ঘরে ঘুঁটি সরানো যাবে। মজা করার জন্যে উল্টো-কাটাকুটি বা অ্যাণ্টিটিকট্যাকটো-ও খেলতে পারো। যেই কারুর তিনটে ঘুঁটি এক লাইনে চলে আসবে তার হার।

কবি ওয়ার্ডস্‌ওর্থ বাচ্চা বয়েসে বিস্তর কাটাকুটি খেলেছিলেন, বড়ো হয়ে সে-কথা স্বীকার করলেও লজ্জায় আর খেলাটির নাম বলেন নি—too humble to be named in verse (*The Prelude*, Book I, পংক্তি 507-13 দ্র)। কিন্তু ভাবো তো, এত সহজ একটা খেলা, যাতে কোথাও ভাগ্য ভালো বা খারাপ হওয়ার কোনো ‘চানস’ নেই, ছপক্ষ একটু চোখ খুলে খেললে ডুখেখানে বাঁধা, সেই খেলাটা এত হাজার বছর ধরে এত জনপ্রিয় রইল কী করে? এ-খেলায় জেতার একমাত্র গ্যারান্টি হলো দুর্বল অর্থাৎ চূড়ান্ত অশ্রমনস্ক এবং / অথবা ভী—ষণ বোকা এবং / অথবা একেবারেই অবোধ শিশুকে প্রতিপক্ষ বেছে নিয়ে তাকে দো-ফাঁদে ফালা। মধ্যের ঘরটা প্রথম চালেই আটকে রাখলে সেটা করাও খুব সোজা। যে প্রথম চালবে, তার চাল থাকে পাঁচটা। সুতরাং জেতার সম্ভাবনাও তারই বেশি।

খেলাটা যে এত জনপ্রিয় তার একটা কারণ হলো প্রথম পাঁচটা চাল আলাদা-আলাদা ভাবে মোট 15120 রকম ভাবে দেয়া সম্ভব (কেন বলো তো?)। সুতরাং যতই চাল বদলাও, ‘এবার আরেক রকমে খেলি’ বলার সুযোগ থাকবেই। সাধারণত যে হেরে যায়, সে-ই উত্তেজিত হয়ে আরেক কায়দায় খেলতে যায়। এবং প্রায়ই আবার হারে।

কাগজে বা প্লেটে (দু মাত্রায়) তিন ঘরের কাটাকুটি খেলতে এখন হয়তো আর সকলের ভালো লাগবে না। কিন্তু চার ঘর বা পাঁচ ঘরের কাটাকুটিটা জমবে ভালো। অন্তত মনোযোগের

পরীক্ষাটা ভালোই হবে। তিন ঘরের খেলাও একটু নতুন করে খেলতে পারো। তুমি ও তোমার প্রতিপক্ষ যখন ইচ্ছে কাটা (x) বা গোলা (o) দিতে পারো। তুমি যে-সারিতে কাটা দিলে, সে-ও সেই সারিতেও কাটা দিলো। তুমি এবার তৃতীয় সারিতে কাটা দাও, তোমার জিৎ। আর সে যদি দ্বিতীয় ঘরে গোলা দেয়, তখন কী করবে? অর্থাৎ প্রশ্ন হলো, কার জেতার সম্ভাবনা বেশি, যে প্রথম দাগ মারবে, না যে তার পরে মারবে?

শেষ কথা : ছু মাত্রায় তিন ঘরের কাটাকুটিতে জেতার সম্ভাবনা থাকে মোট আটটা সারিতে (লম্বালম্বি, আড়াআড়ি, কোণাকুণি)। চার ঘর বা পাঁচ ঘরের খেলায় মোট ক-টা সারিতে জেতা যাবে? মাত্রা এবং ঘর—ছ-এর সংখ্যাই যদি আরো বাড়ানো হয়, তবে তার ক্ষেত্রে সাধারণ সূত্রটা কী হবে?


### 39. বাসাবদল

একটা 2' 8" x 3' 8" কাঠ বা পিচবোর্ডের টুকরো জোগাড় করা খুব শক্ত নয়। 1 ইঞ্চি বর্গ আকারের পাঁচটা পিচবোর্ডের টুকরো বসিয়ে নাও (ছবিতে যে-র'ম আছে)। 1 আর 3-এর মধ্যে কিছু নেই। এখন বুদ্ধি করে মোট সতেরো চালে 3 নম্বরের ঘুঁটিটাকে 6 নম্বরে আর 6 নম্বরেরটাকে 3 নম্বরে পাঠিয়ে দাও। কাজের সুবিধের জন্তে 3 নম্বরটা কালো আর 6 নম্বরটা লাল রং করে নিতে পারো।

1	ফাঁকা	3
4	5	6

## 40. একটি খুচরো সমস্যা


ছবিতে পাঁচটা মুদ্রা সাজানো আছে—তিনটে পঁচিশ পয়সার, দুটো দু পয়সার। এখন, একসঙ্গে দুটো করে গায়ে-লাগা পয়সা (একটা পঁচিশ আরেকটা দুই) সরিয়ে আবার অল্প একটা পয়সার গায়ে লাগিয়ে বসাতে হবে। মধ্যে যে ফাঁক হবে, পাশের পয়সাটা ঠেলে সরিয়ে সেটা ম্যানেজ করা যাবে না। আবার জোড়ে একটা পঁচিশ আরেকটা দুই সেখানে এনে বসাতে হবে। কোনো পয়সা ঘুরিয়ে উল্টো করা চলবে না। এতগুলো না-র বেড়া পার হয়ে কমপক্ষে কত চালে (সরানো-বসানো মিলিয়ে এক চাল) পয়সা-গুলোকে এমন করে সাজাতে পারো, যাতে একদিকে তিনটে পঁচিশ আর অল্পদিকে দুটো দুই পাশাপাশি থাকবে ?



আর মুদ্রার সংখ্যা যদি দুই করে বাড়িয়ে চলা হয় (চারটে পঁচিশ তিনটে দুই, পাঁচটা পঁচিশ চারটে দুই ইত্যাদি ইত্যাদি) তাহলেই বা ঐ কায়দায় দু ধরনের পয়সা দুদিকে বসাতে কমপক্ষে ক-টা চাল লাগবে ? এর কোনো সাধারণ সূত্র বার করতে পারো ?

## 41. ঘড়ি ভাগ

নিচে একটা ঘড়ির ডায়ালের ছবি রয়েছে। I থেকে XII অবধি লেখা এই বৃত্তটাকে এমন চার ভাগে ভাগ করো যাতে প্রত্যেক ভাগের সংখ্যাগুলোর যোগফল 20 হয়।



## 42. দ্যাখার ভুল

পরশু রাতে পষ্ট চোখে দেখলু বিনা চশমাতে


পাস্তভূতের জাস্ত ছানা করছে খেলা জোছনাতে।

বলেছিলেন ‘আবোল-তাবোলে’র কবি। অবশুই এতে আপত্তির কোনো কারণ থাকতে পারে না। দেখতে চাইলে কত কী ছাখা যায়। তোমার ছ হাতের বকবার আঙুল ছটো (সংস্কৃত-য় যাকে বলে তর্জনী) এক করে, বাকি আঙুলগুলো মুড়ে, চোখের লেভেল-এ তুলে, সামনের কোনো সাদা দেয়ালের দিকে তাকিয়ে থাকো (খবরদার! আঙুলগুলোর দিকে নয়!)। খানিক বাদে আঙুল ছটো একটু ফাঁক করো, পষ্ট দেখবে আরেকটা আঙুল, একটু ছোটো মতো দেখতে, দিবি পুলিপিঠের মতো চোখের সামনে শূণ্ণে ভাসচে। এবার ভালো করে আঙুল ছটোর দিকে তাকাও। ব্যস, পিঠে নিরুদ্দেশ।

একটা কাচের গেলাস, মানে যাতে আমরা জল-টল খাই আর

কি, কতটা লম্বা? হাতের তেলোটা সোজা করে বলো তো, মধ্যমার ডগা থেকে কতখানি হবে? কজি পর্যন্ত? এবার মেপে ছাখো, সব ক-টা কররেখাও পার হয় নি। ছাখো দিকি, তোমার নিজের চোখছটো তোমার সঙ্গেই কী র'ম বিশ্বাসঘাতকতা করেছে।



এখন এই লাইনছটোর দিকে তাকাও। কোন্টা বেশি লম্বা?




তলারটা তো? আবার তোমার চোখ বিশ্বাসঘাতকতা করেছে। ছটো লাইনই সমান। আসলে চোখছটোকে দোষ দিয়েও খুব লাভ নেই। যখনই আমরা কোনো কিছু দেখি, তখন তো আর সবাই অর্জুন হয়ে যাই না। পাখির চোখ ছাড়াও চারধারের আরো অনেক কিছু দেখি। জ্রোণাচার্য বৃথাই কুরুপাণ্ডবদের ধমকেছিলেন। এক চোখ না-বুজে লক্ষ্যস্থির করাও বড়ো সহজ কাজ নয়। ঐ লাইন ছটোর ব্যাপারে তোমার ভুলটা হয়েছে পাশের <> আর >< চিহ্নগুলোর জগে।

তারপর ধরো মাথার মধ্যে এমন সব ছবি আগে থাকতে তৈরি হয়ে থাকে যে, অনেক সময় অদ্ভুত-অদ্ভুত কথা বলে ফেলি। 5'5" একটা ছেলেকে দেখলে বলবে, মাঝারি গোছের লম্বা। আর ঐ একই 5'5" লম্বা একটা মেয়েকে দেখে বলবে, বাব্বা, কী ঢ্যাঙা!

এবার তলার ছবি ছটো ছাখো। ছবিটা দেখতে-দেখতে চড়াক করে কেমন যেন ঘুরে যায়!



এবারে এই অদ্ভুত পাঁচিলটা। এর যে-কোনো একটা ধাপ থেকে উঠতে শুরু করো, উঠতে উঠতে আবার সেই ধাপেই এসে থামবে। আবার ঐ ধাপ থেকেই নীচে নামতে থাকো, সেই ধাপেই নেবে থামবে! আরো পরখ করে দেখতে চাও ছাখো—হয় উঠেই চলেচে, নয় নেবেই চলেচে। ব্যাপারটাই ঐ বকম!




### 43. রাজার খেলা দাবা

আউটডোর খেলার রাজা হলো ক্রিকেট, ইন্ডোরের দাবা। চৌষট্টিটা সাদা-কালো ঘর, সাদা-কালো রাজা, মন্ত্রী, গজ, বোড়া, নৌকা, বোড়ে—এই নিয়ে রাজায় রাজায় লড়াই। প্রত্যেকের চাল আলাদা আলাদা। বোড়ে যায় প্রথমে দু পা (ইচ্ছে করলে এক পা), তারপর মাত্র এক পা, শুধু খাওয়ার সময় কোণাকুনি। নৌকো আটটা ঘরেই সোজাসুজি চলতে পারে। গজ ছোট্ট কোণাকুনি। মন্ত্রী একই সঙ্গে নৌকো ও গজ—দু-এর মতোই চলতে পারে। রাজা বেচারি এক ঘরের বেশি চলতে পারে না। এ-খেলা যে জানে তার জন্তে অবশ্য এ-সব বলা বাহুল্য। যে জানে না তারও কোনো



সমস্যা নেই, ছবিটা দেখলেই বুঝতে পারবে মন্ত্রীরা চলাচল কোন পথে।




এখন মন্ত্রীকে মন্ত্রণা দিতে হবে কী করে তিনি ওপর থেকে দু-নম্বর সারির ডান দিকের তিন নম্বর ঘর থেকে ( দাবা খেলায় যার নাম K B 7 বা f 7 ) যাত্রা শুরু করে সোজা পথে ( অর্থাৎ নৌকোর মতো ) মাত্র পনেরোটা চালে বোর্ডের সব ক-টা ঘর ঘুরে আসতে পারেন। অবশ্যই মন্ত্রীমশাই কোনো ঘরে ছুবার যাবেন না, তবে যে-কোনো ঘরে এসে থামতে পারেন।

দ্বিতীয় কথা, আটটা সারিতে মন্ত্রী এমন ভাবে বসাতে পারো যে, কেউ কাউকে খেতে পারবে না ?

## 44. টোপোলজির খেলা

তিন ফালি কাগজ নিয়ে দুটো মুখ আঠা দিয়ে জুড়ে নাও। তারপর ছবিতে যেমন ছাখানো হয়েছে তেমনি প্রথমটাকে সোজা রেখে, যে কোনো একটা মুখ ধরে দ্বিতীয়টাকে  $180^\circ$  আর তৃতীয়টাকে  $360^\circ$  পাক খাওয়াও। এবার ভেতরের দাগ বরাবর কাঁচি দিয়ে কেটে




চললে প্রথমটা থেকে দুটো আলাদা ফালি বেরিয়ে আসবে। দ্বিতীয় আর তৃতীয়টাব চেহারা কী র'ম দাঁড়াবে? দুটো আলাদা ফালি পাবো, নাকি অন্য কিছু হবে? আগে ভাবার চেষ্টা করো, তারপর কাটো।

## 45. তাসের দেশ

একটা প্যাকেটে ক-টা তাস থাকে? বাহান্নটা। এক বছরে ক-টা হপ্তা? বাহান্ন। টেকাকে ইংরিজিতে বলে ACE, এই Ace থেকে Two, Three,……,King পর্যন্ত তাসগুলোর নাম লিখে সব ক-টা অক্ষর যোগ করো, যোগফল বাহান্ন। সব ক-টা তাসে যতগুলো ফোঁটা আছে, যোগ করো (গোলামকে 11, বিবিকে 12 আর সায়েবকে 13 ধরে)—যোগফল 364, একটা জোকার আছে,

তাহলে + 1, মানে 365, অতিবর্ষ বা লিপ ইয়ার-এর জন্মে আরেকটা জোকার তোলা রইল।  $3+6+5=14$ , দিবি 7 দিয়ে বিভাজ্য। 7 কেন?  $52-র 5+2=7$ , ব্যাপারটা কী র'ম হলো?

এখন নিচে যে ষোলোটা তাস সাজানো আছে, সেইভাবে তুমিও সাজাও। তারপর বন্ধু-বান্ধবদের বলো, যার য-টা ইচ্ছে তাস উল্টে রাখুক। তুমি তখন পাশের ঘরে বসে রেডিও শুনতে পারো। আরো মজা ছাখাতে চাও তো কাউকে বলো একটা ইয়া মোটা কাপড় দিয়ে তোমার চোখ বেঁধে দিতে। সকলের তাস ওল্টানো শেষ হলে ঘরে ঢুকে বা চোখের বাঁধন খুলে একবার তাকাও—তারপর পটাপট বলে দাও কোন্ কোন্ তাস ওল্টানো হয়েছে।




কী করে বলবে? ছাখো, প্রত্যেকটা তাসের মাঝের ফোঁটাগুলো

ওপর দিকে মুখ করে রয়েছে। উল্টে দিলে চেহারা তো পাল্টাবেই। তাহলে আর বুঝতে অসুবিধে কী।

সব তাসে কিন্তু এ-খেলা ছাখানো যাবে না। ওপরের ষোলোটা তাস ছাড়া আর মাত্র ছ-টা তাসের এ-গুণ আছে। সেগুলো কী কী?


## 46. ব্রহ্মগুপ্তের সমস্যা

তিন সারিতে যে ন-টা বিন্দু রয়েছে তার সব ক-টাকে চারটে সরল রেখা দিয়ে জুড়তে পারবে? মনে রেখো, কাগজ থেকে পেন্সিল তোলা যাবে না। এটা ওরিগামি নয়, স্মৃতরাং এ-ধার ও-ধার ভাঁজ করার কৌশল করতে যেও না যেন!



## 47. ঘরে-বাইরে

দুটো কাচের গেলাস (পলিথিনেরও নিতে পারো) নিয়ে একটাকে আরেকটার মধ্যে ঢুকিয়ে দিয়ে একটু আলাগা করে রাখো। এখন



হাত পা দাঁত কিছু ব্যবহার না-করে, সাঁড়াশি বা ক্লিপ বা কাঠি না-ঠেকিয়ে ভেতরের গেলাসটাকে বার করে আনতে পারবে? টেবিলের ওপর দড়াম দড়াম করে ঘূষি মেরো না যেন!

## 48. হাতি-গলা ফাঁক

হলফ করে বলতে পারি, এ-র'ম সার্কাস তোমরা জীবনে দ্যাখোনি। একটা স্টেটখাটো চেহারার লোক, ভীড় দেখে হাঁটুতে রীতিমতো কতাল বাজচে, সে কিনা আমাদের বেকুব বানিয়ে দিলো !

লোকটা পকেট-টকেট হাতড়ে একটা কাগজ বার করলো, স্কেল দিয়ে মেপে দ্যাখালো—6"×6". মাইকে ঘোষণা শোনা গেলো, লোকটা ঐ কাগজের মধ্যে দিয়ে নাকি সার্কাসের বিশাল হাতিটাকে গলিয়ে দেবে। লোকটা একটা কাঁচি দিয়ে কাগজটা কাটতে শুরু করলো। কাগজের গর্তটা যত বড়ো হয় আমাদের চোখও তত বড়ো হতে থাকে। কোনো আঠা আলপিনের ব্যাপার নেই, সেরেফ কাঁচি দিয়ে কাগজটা কেটে ট্র্যাপিজের তারে ঝুলিয়ে দিলো। আর হাতিটাও দিব্যি গজেন্দ্রগমনে তার ফাঁক দিয়ে গলে গেলো। তুমুল হাততালির মধ্যে লোকটা আরো নার্ভাস হয়ে নিজেও ঐ ফাঁকের মধ্যে দিয়ে গলে ভেতরে চলে গেলো।

বাড়িতে গিয়ে দেখলুম, কাগজ কেটে হাতি-গলা ফাঁক আমিও করতে পারি। আশা করি তোমরাও পারবে।

## 49. লীলাময়বাবুর লীলাখেলা

বরষাত্রী গিয়ে এ কি হৃদশা ! তিরিশজন বরষাত্রী সেজেছে সেণ্ট-টেন্ট মেখে ( ছবি উঠবে তো ! ) বিকেল পাঁচটায় বাড়ি থেকে বেরিয়েচে। পাছে খিদে মরে যায় এই ভয়ে বিকেলের জলখাবার পর্যন্ত খায় নি। আর এখন রাত দশটা বাজতে চললো, খাবারের সাড়াশব্দ নেই। কনের মেসো লীলাময়বাবু ব্যস্তসমস্ত হয়ে সব যোগাড়-যন্ত্র করে দিচ্ছিলেন। কনের বাবার রাগ পড়লো তাঁর ওপর। তাঁর জন্তাই তো এই অনর্থ ঘটেচে। মাছ এসচে আটটার সময়। দই-মিষ্টি কবে আসবে কে জানে। লীলাময়বাবু কিন্তু

নির্বিকার। ‘আর তো মিনিট পনেরোর ব্যাপার। ওটুকু সময় আমিই ম্যানেজ করে দিচ্ছি। এমন খেলা ছাখাবো না, সব রাগ জল হয়ে যাবে।’ বলে একটা আস্ত দেশলাই বাক্স নিয়ে নিচে চলে গেলেন।



বরযাত্রীদের দিকে দু হাত তুলে লীলাময়বাবু বললেন, ‘নমস্কার, দাত্তরা। আমি হচ্ছি কনের মেসো, আমাব জন্তেই আপনাদের এত দুর্ভোগ। আমি আবার পুরনো দিনেব চার্টার্ড অ্যাকাউন্টান্ট। হিসেবের গবমিল একদম সহ্য করতে পারি না। এই হিসেবের বাতকের জন্তা সমীকরণ ব্যাপারটা আমার খুব প্রিয়। অসমান জিনিস আমি একদম বরদাস্ত করি না। যেমন ধরুন,’ বলে পাখাটা নিভিয়ে, কবাসেব ওপব বসে, দেশলাই বাক্সটা খুলে কয়েকটা কাঠি সাজালেন।

‘দেখতেই পাচ্ছেন’, লীলাময়বাবু প্রায় যাহুকরের মত হাত নেড়ে বললেন, ‘দুটো দিক সমান নয়। একটা কাঠি যে-কোনো দিক থেকে সবিয়ে যে-কোনো দিকে বসিয়ে দুটোদিক সমান করতে হবে। না-হলে আমি সাবা রাত বিছানায় ছটফট কববো।’ সবাই খুব উৎসাহ নিয়ে ঝুঁকে পড়লো, কিন্তু কাকরই মাথায় এলো না কী কবে  $\frac{XXII}{VIII}$  আর II-এর সমীকরণ করা যায়। লীলাময়বাবু এক মিনিট অপেক্ষা করে VIII-এর একটা কাঠি তুলে II-এর মাথায় বসিয়ে দিলেন। নিতবর পিণ্টু আনন্দে হাততালি দিয়ে উঠলো। ঠিক পরশুদিন ত্রিকোণমিতির ক্লাশে সে শিখেচে  $\pi$ -এব মান  $\frac{22}{7}$ । সে ধরে বসলো আরো খেলা ছাখাতে হবে।

ববের পিসে অবশ্য খুব একটা মজা পেয়েছেন বলে মনে হলো না। ঘোঁৎ ঘোঁৎ করে তিনি বললেন,  $\pi = \frac{22}{7}$  এটা কি সমীকরণ হলো?

লীলাময়বাবু ব্যস্ত হয়ে বললেন, ‘না-না, এ একটা উদা’রণ

দিলুম। এবার এইগুলো দেখুন তো। সব ঠিকঠাক আছে তো?’ বলে কাঠিগুলো তিনটে সারিতে সাজিয়ে বললেন, ‘একটা করে কাঠি সরিয়ে, আবার বসিয়ে ছোটোদিক সমান করে দিন তো।’



প্রথমটা পিণ্টু, দ্বিতীয়টা বর, আর তৃতীয়টা বরের পিসে নিজেই করে দিলেন।

আশা করি তোমরাও এগুলো পারবে।

## 50. ভূতুড়ে গেঁট

একটা বড়ো রুমালের ছোটো মুখ কোণাকুনি ধরো। এবার কোনো দিকের আঙুল না-ছেড়ে রুমালটার মধ্যেখানে একটা গেরো দিতে পারবে? ধরার সময় যে-ভাবে ইচ্ছে ধরতে পারো, কিন্তু গেঁট দেয়ার সময় কোনো দিকের আঙুল ছাড়া চলবে না।

## 51. সাংখ্যদর্শন

মানুষ কী করে গুনতে শিখলো বলা শক্ত। তবে প্রথম দফায় আমি আর তুমি, অর্থাৎ 1 আর 2-এর বেশি গোনা তার পক্ষে সম্ভব ছিল না। ‘অনেক’ বা ‘প্রচুর’ বোঝাতে তারা বলতো, ‘আমি-তুমি আমি-তুমি আমি-তুমি...’। দুই হাজারিয়ান বড়োমানুষের মধ্যে একবার বাজি হলো—কে সবচেয়ে বড়ো সংখ্যার নাম করতে পারে। প্রথমজন বললো, তিন। দ্বিতীয়জন বিস্তর মাথা চুলকেও তার চেয়ে বড়ো সংখ্যা বলতে পারলো না। শূন্য (0) আবিষ্কার করতে অনেক সময় লেগেছে। ভারত থেকেই আরবদের মারফৎ এটি ইউরোপে পৌঁছয়। সব মিলিয়ে সংখ্যার অসংখ্য বিকাশ কিন্তু খুবই মজার।

123456789	987654321
12345678	87654321
1234567	7654321
123456	654321
12345	54321
1234	4321
123	321
12	21
1	1

বলো তো, কোন্ দিকের যোগফলটা বড়ো হবে। সময় : পাঁচ সেকেন্ড।

এতে আর কী মজা! তাহলে চাখো :  $123456789 \times 8 + 9$   
 $= 987654321$ . আর গুণই যদি করতে হয় :

$$\begin{aligned}
 0 \times 9 + 1 &= 1 \\
 1 \times 9 + 2 &= 11 \\
 12 \times 9 + 3 &= 111
 \end{aligned}$$



$$123 \times 9 + 4 = 1111$$

$$1234 \times 9 + 5 = 11111$$

$$12345 \times 9 + 6 = 111111$$

চললো অন্ধৈতের লীলা।

বিয়োগ করলেও ঐ ব্যাপার।

$$9\ 8\ 7\ 6\ 5\ 4\ 3\ 2\ 1$$

$$1\ 2\ 3\ 4\ 5\ 6\ 7\ 8\ 9$$

---


$$8\ 6\ 4\ 1\ 9\ 7\ 5\ 3\ 2$$

1 থেকে 9 অবধি ঘুরে ফিরে সবাই আছে।

আবার গুণেই ফেরা যাক। শুধু 8-টা বাদ দিয়েচি।

$$12345679 \times 9 = 111111111$$

তেমনি

$$12345679$$

$$999999999$$

---


$$12345678987654321$$

9-এর গুণিতক দিয়ে :

$$987654321 \times 9 = 8888888889$$

$$\times 18 = 17777777778$$

$$\times 27 = 26666666667$$

$$\times 36 = 35555555556$$

$$\times 45 = 44444444445$$

$$\times 54 = 53333333334$$

$$\times 63 = 62222222223$$

$$\times 72 = 71111111112$$

$$\times 81 = 80000000001$$

আবার ভাগফল :

$$1 \div 9 = \cdot 1111111\ldots$$

$$2 \div 9 = \cdot 222222 \dots\dots$$

$$3 \div 9 = \cdot 333333 \dots\dots$$

$$8 \div 9 = \cdot 888888 \dots\dots$$

এবার ধাঁধায় আসা যাক। তিনটে 9 দিয়ে 10 লেখা খুবই সোজা।  
 $9 + \frac{9}{9} = 10$ . কিন্তু তিনটে 9 দিয়ে 20 লেখা যায় কী করে? সব  
 রকম পাটীগণিতচিহ্ন, অর্থাৎ যোগ-বিয়োগ-গুণ-ভাগ-দশমিক-পৌনঃ-  
 পুনিক দশমিক-বর্গমূল-ঘনমূল-বন্ধনী সবই ব্যবহার করতে পারো।

খুব শক্ত মনে হচ্ছে? আচ্ছা। চারটে 4 দিয়ে 64 লেখা যায়  
 কী করে? অতি সোজা কাজ:  $(4+4) \times (4+4)$ । তিনটে  
 4 দিয়ে তো আরো সোজা, প্রায় জল:  $4 \times 4 \times 4$ . কিন্তু যদি  
 বলি ছোটো 4 দিয়ে 64?

চারটে 4 দিয়ে 1, 2, 3, 4, ..., 20 অবধি খুব সহজেই লেখা যায়,  
 অবশ্য সব রকম পাটীগণিতচিহ্ন ব্যবহার করে। চারটে 2 দিয়ে  
 1 থেকে 20 অবধি লেখা যায় কী করে?

$\frac{2+2}{2} = 1$ ,  $\frac{2}{2} + \frac{2}{2} = 2$ ,  $2 + 2 - \frac{2}{2} = 3$ ,  $2 \times 2 + \frac{2}{2} = 5$ ,  $2 \times 2 + 2 + 2 = 8$ ,  
 এ তো করাই যায়। কিন্তু চারটে 2 দিয়ে 7, 17, 19? চেষ্টা করে  
 ভাখো। আর হ্যাঁ, চারটে 2 দিয়ে বৃহত্তম সংখ্যা কী লেখা যায়—  
 কোনো সংকেতচিহ্ন ব্যবহার না-করে। 2222 নিশ্চয়ই নয়। তবে  
 কী?

এ-র'ম আরো কতকগুলো দ্যাখো। পাটীগণিতের সব চিহ্ন  
 ব্যবহার করতে পারো।

এক ॥ চারটে 1 দিয়ে 7

দুই ॥ ছোটো 2 দিয়ে 32

তিন ॥ তিনটে 3 দিয়ে 24

চার ॥ ছোটো 5 দিয়ে 125

পাঁচ ॥ দশটা 6 দিয়ে 1000

ছয় ॥ পাঁচটা 7 দিয়ে 700

সাত ॥ ছুটো 8 দিয়ে 3

আর তিনটে প্রশ্নের উত্তর দাও :

আট ॥  $4^4$  মোট ক-অংকের সংখ্যা ?

নয় ॥ 1 থেকে 100-র মধ্যে ক-টা 9 আছে ?

দশ ॥ 1000 ! (অর্থাৎ  $1 \times 2 \times 3 \times \dots \times 999 \times 1000$ )—

সংখ্যাটার শেষে কতগুলো শূন্য থাকবে ?

সংখ্যার আরো কিছু সমস্যা :

এগারো ॥ 60 থেকে 70 এর মধ্যে একটা সংখ্যা বলো, যাকে চার ভাগ করে প্রথম ভাগের সঙ্গে 3 যোগ করলে, দ্বিতীয় ভাগ থেকে 3 বিয়োগ দিলে, তৃতীয় ভাগকে 3 দিয়ে গুণ করলে ও চতুর্থ ভাগকে 3 দিয়ে ভাগ করলে একই ফল পাবে ?

বারো ॥ তিন সেকেন্ডে মনে মনে গুণ করো :  $85 \times 85$  (এর একটা অতি সহজ কৌশল আছে)

তেরো ॥ কাকেশ্বর কুচকুচের প্রশ্ন : 20-র  $\frac{1}{4}$  যদি 6 হয়, তবে 10-এর  $\frac{1}{8}$  কত হবে ?

আবার 1 থেকে 9-এর মধ্যেই ঢোকা যাক ।

চোদ্দো ॥ 1,3,5,7 আর 9—এই ক-টি বিজোড় সংখ্যা যোগ করলে যোগফল হয় 25, আর 2, 4, 6 আর 8—এদের যোগফল 20, এখন এই ক-টি সংখ্যাকে এমন ভাবে সাজিয়ে যোগ করো যাতে জোড় এবং বিজোড় সংখ্যার একই যোগফল হবে। জটিল বা বিদ্বুষ্টে ভগ্নাংশ বা পৌনঃপুনিক দশমিক ব্যবহার করা চলবে না।

পনেরো ॥ 1 থেকে 9 অবধি সব ক-টা অংককে বাড়তি দিকে অর্থাৎ ascending order-এ লিখে যোগ করলে যোগফল হয় 45. এখন, ঐ ক-টি অংককে ঐ বাড়তির দিকে লিখে 45-এর নামতা সাজাতে পারো ?

ষোলো ॥ খুঁজে পেতে এমন একটা সংখ্যা বার করতে পারো,

যার বর্গ হবে ন-অংকের একটা সংখ্যা, যাতে 1 থেকে 9 অবধি সব ক-টা সংখ্যা একবার করে বসবে ?

সতেরো ॥ 1 থেকে 9 এই ন-টি অংকে যোগ করে যোগফল 100 করতে পারবে ? ( দশমিক ও পৌনঃপুনিক দশমিক ব্যবহার করা চলবে ) ।

এবার 9-এর সঙ্গে আরেকটা অংক যোগ করা যাক—0.

আঠারো ॥ 1 থেকে 0 অবধি দশটি অংকে এমন দুটি ভগ্নাংশে সাজাও যার যোগফল হবে 1. কোনো অংক দুবার ব্যবহার করা চলবে না ।

উনিশ ॥ এবার ঐ দশটি অংকেই এমনভাবে দশমিকে সাজাও যার যোগফল হবে 1 ( পৌনঃপুনিক চলতে পারে, কিন্তু কোনো অংক একবারের বেশি বসবে না ) ।

কুড়ি ॥ 1 থেকে 0-কে জোড়া করে-করে সাজাও যাতে পাঁচটি জোড়ের প্রত্যেকটিই প্রথম জোড় দিয়ে বিভাজ্য হয় ( যেমন, 14, 28 ইত্যাদি । উত্তরটি কিন্তু অনন্য অর্থাৎ unique. কোনো অংক দুবার বসবে না ) ।

আদর্শ সংখ্যা বা Perfect number কাকে বলে জানো ? যে-সংখ্যার গুণিতকগুলোর যোগফল সেই সংখ্যার সমান, আর গুণিতক-গুলোর বিপরীত বা reciprocal-এর (মূল সংখ্যাটির বিপরীত মুন্ধু) যোগফল সর্বদাই 2, তাদেরই বলে আদর্শ সংখ্যা । সবচেয়ে ছোটো আদর্শ সংখ্যা 6 ( $1 + 2 + 3 = 6$ ,  $\frac{1}{1} + \frac{1}{2} + \frac{1}{3} + \frac{1}{6} = \frac{1}{1} = 1$ ) । তার ঠিক পরেই আদর্শ সংখ্যা কোন্টা ?

একুশ ॥ 1 থেকে 9 অবধি সব ক-টা অংক এমন ভাবে ভগ্নাংশে লেখো যার ভাগফল 9 হবে । কোনো অংক দুবার বসানো চলবে না ।

বাইশ ॥ 1 থেকে 9 দিয়ে চারটে বর্গ সংখ্যা তৈরি করো, একই অংক দুবার ব্যবহার না-করে ।

তেইশ ॥ পাঁচটা বিজোড় অংক বা figure যোগ করে যোগফল 14 করতে পারো ?

চব্বিশ ॥ সবচেয়ে ছোটো কোন্ সংখ্যার কথা ভাবতে পারো যাকে 10 দিয়ে ভাগ করলে 9, 9 দিয়ে ভাগ করলে 8,...2 দিয়ে ভাগ করলে 1 ভাগশেষ থাকবে ?

চারটে 5 দিয়ে 100 লেখা খুব সোজা :  $(5+5) \times (5+5)$ .  
চারটে 9 দিয়েও শক্ত নয় :  $99 + \frac{9}{9}$ . কিন্তু চারটে 7 দিয়ে 100 ?  
পাঁচটিগণিতের সব চিহ্ন ব্যবহার করতে পারো।

পঁচিশ ॥ 48 সংখ্যাটা খুব অদ্ভুত। এর সঙ্গে 1 যোগ করে 49, অর্থাৎ 7-এর বর্গ। তেমনি 48-এর আদ্বৈক 24, তার সঙ্গে 1 যোগ করলেও আরেকটা বর্গ সংখ্যা পাওয়া যাচ্ছে।  
এ-র'ম অদ্ভুত সংখ্যার অবশ্য কোনো শেষ নেই। কিন্তু 48-এর ঠিক পরেই কোন্ সংখ্যার এই গুণ আছে, বলতে পারো ?

ছাব্বিশ ॥ এবার একটা শূন্যস্থান পূরণের ব্যাপার।

1 2 3 4 5 6 7 8 9 = 100. 1 আর 2, 2 আর 3,...  
8 আর 9-এর মধ্যে যে-ফাঁকগুলো আছে, সেখানে শুধু যোগচিহ্ন (+) আর সেটাকে  $45^\circ$  ঘোরালে যা হয়, অর্থাৎ গুণচিহ্ন ( $\times$ ) বসিয়ে সমীকরণটা মিলিয়ে দাও। এটা যদি পারো তা'লে এবার যোগচিহ্ন, বিয়োগচিহ্ন আর প্রথম বন্ধনী দিয়ে শূন্যস্থান পূরণ করো। দেখো, সমীকরণটা যেন মেলে।

## 52. ধাঁধালি

এক ॥ এক ভদ্রলোক খুব ক্লান্ত হয়ে রাত দশটায় ঘুমোতে গেলেন ।  
পাছে বেশি ঘুমিয়ে পড়েন তার জন্তে পরের দিন এগারোটায়  
অ্যালার্ম দিয়ে ঘড়িটা খাটের পাশে রাখলেন । অ্যালার্মের  
আওয়াজে তাঁর ঘুম ভাঙলো । ভদ্রলোক ক-ঘণ্টা  
ঘুমিয়েছেন ?

দুই ॥ ইন্টারভিউ দিতে গ্যাচে দুই ভাই । ছাখা গেলো, তাদের  
বয়েস এক, বি-কম পাশ করেছে একই বছরে, বাবা-মার  
নাম এক, বাড়ির ঠিকানা এক । জিগেস করা হলো :  
আপনারা ক-কিছু যমজ ? দুজনেই বললেন, না সার । তাহলে  
তাদের সম্পর্কটা কী ?

তিন ॥ গন্ধকার ঘবে ঢুকলুম । লোড-শেডিং । জানি, ঘরের  
মধ্যে একটা হ্যাভিকেন, একটা লাম্পা, আর একটা  
মোমবাতি আছে । পকেট হাতড়ে দেখি দেশলাই বাজ্ঞে  
একটা হাত্রে কাঠি রয়েছে । আগে কোন্টা জ্বালবো ?

চার ॥ কোন্ কথাটা সব মাস্টারমশাই ভুল উচ্চারণ করেন ?

পাঁচ ॥ অংকে লেখো : ন হাজার নশ নিরানব্বই, বারো হাজার  
বারোশ বারো ।

ছয় ॥ বছরের ক-টা মাসে তিরিশ দিন আছে ?

সাত ॥ সব খেলায় প্রথমে এলে ফাস্ট হয় । কোন্ খেলায় ফাস্ট  
হবে সবার শেষে এলে ?

আট ॥ কাটলে একটা, না কাটলে দুটো । জিনিসটা কী ?

নয় ॥ 50-কে  $\frac{1}{2}$  দিয়ে ভাগ করে 3 যোগ করলে কত হয় ?

দশ ॥ একটা দাড়ির দৈর্ঘ্য কত ?

এগারো ॥ টেলিফোনে কোন্ নম্বর ডায়াল করলে সর্বদাই পিপ্  
পিপ্ পিপ্ অর্থাৎ এন্‌গেজ্‌ড টোন পাবেই ?

বারো ॥ একটা অ্যাকুয়ারিঅম-এ তেরোটা মাছ ছিল। তার চারটে গেলো মরে। ক-টা রইল ?

তেরো ॥ শৃংখ্যান পূরণ করো : বাবর হুমায়ূনের বাবা, বাবর হুমায়ূনের বাবার\_\_।

চোদ্দো ॥  $10' \times 10' \times 10'$  গর্ত খুঁড়তে যদি 10 টাকা মজুরি হয়,  $5' \times 5' \times 5'$  গর্ত খুঁড়লে কত মজুরি হবে ?

পনেরো ॥ তিনটে বেড়ালের তিনটে ইঁদুর খেতে যদি তিন সেকেন্ড সময় লাগে, তবে একশটা বেড়ালের একশটা ইঁদুর খেতে কত সময় লাগে ?

ষোলো ॥ দেশ আছে মাটি নেই, শহর আছে মানুষ নেই, সাগর আছে জল নেই—ব্যাপারটা কী ?

সতেরো ॥ সেদিন একটা দোকানে অদ্ভুত প্রশ্নোত্তর শুনলুম।

— একটার দাম কত ?

— কুড়ি পয়সা।

— বাইশটা ?

— চল্লিশ পয়সা।

— আমি দুশ তেইশটা নোবো। কত পড়বে ?

— ষাট পয়সা।

দোকানটায় কী বিক্রি হয় ?

আঠারো ॥ যুদ্ধষ্টির উদ্দেশ্যে বকরূপী যক্ষ তথা ধর্মের অপ্ৰকাশিত প্রশ্ন : যশু কখন হর্যক্ষের মাংস ভক্ষণ করে ?

উনিশ ॥ 25—এই সংখ্যাটি থেকে ক-বার 1 বিয়োগ করা যায় ?

কুড়ি ॥ ছোটো ঘড়ি, একটা রোজ পাঁচ মিনিট শ্লো যায়, অশ্রুটা একদম চলেই না। কোন্টা ভালো সময় দেবে ?

একুশ ॥ ছোটো মুরগী ছদিনে ছোটো ডিম পাড়লে, ছ-টা মুরগী ছ-দিনে ক-টা ডিম পাড়বে ?

বাইশ ॥ আমার পোলট্রিতে ছিল সতেরোটা হাঁস। ন-টা বাদে সব ক-টাই শেয়ালে নিয়ে গেলো। ক-টা হাঁস রইল ?

তেইশ ॥ অমাবস্যা তিথি। আপাদমস্তক কালো রূপার মুড়ি দিয়ে একটা লোক রাস্তা পার হচ্ছে। এমন সময় একটা কালো অ্যাম্বাসাডার তীর বেগে তার দিকে ছুটে এলো। রাস্তায় কোনো ল্যাম্পপোস্ট নেই। গাড়ির হেডলাইটও নেভানো। গাড়িটা ঠিক তাকে পাশ কাটিয়ে বেরিয়ে গেলো। ড্রাইভার নাকি লোকটাকে দেখতে পেয়েছিল। কী করে দেখলো ?

চব্বিশ ॥ ডিলাক সিং এক মাইল ছোটে 5:17 মিনিটে, রিলাক সিং 5:17 মাইল ছোটে এক ঘন্টায়। কে বেশি জোরে ছোটে ?

পঁচিশ ॥ লিলি পাখি বসে ছিল সারা ছাদ জুড়ে  
ডড পাখি ফস্ করে চলে গেলো উড়ে।  
কত পাখি সেই ছাদে রয়ে গেলো পড়ে ?

ছাব্বিশ ॥ একটা সিংহ বনের মধ্যে কতদূর ঢুকতে পারে ?

সাতাশ ॥ হাতের বুড়ো আঙুল আর কড়ে আঙুলের মধ্যে কতখানি তফাৎ ?

আটাশ ॥ যদিইন বেকার ছিলুম, ছিলুম। এখন এক সঙ্গে ছোটো চাকরি পোয়েচি। একটার মাইনে বছরে 1000 টাকা, বছরের শেষে 200 টাকা ইনক্রিমেন্ট। অন্যটার মাইনে ছ মাসে 500 টাকা, আর ছ মাস অন্তর 50 টাকা ইনক্রিমেন্ট। কোনটা নি, বলো তো ?

উনতিরিশ ॥ গজু বাড়ির দরজায় দাঁড়িয়ে এক মনে গুনচে তাদের গলি দিয়ে কত লোক যায়। ভজুও তাই করতে, রাস্তায় পায়চারি করতে করতে। কে বেশি লোক গুনবে ?



- তিরিশ ॥ রাস্তায় প্যাচপ্যাচে কাদা। তুলসী ছুপা এগোয় তো  
তিন পা নেছোয়। ও এখন ইস্কুলে পৌঁহবে কী করে ?
- একতিরিশ ॥ চায়ের দোকানে তিন ভদ্রলোক বসে তিনটি ডবল হাফ  
চায়ের অর্ডার দিলেন। তিনজনকেই চিনি। একজন  
বিবাহিত, একজন বিপত্নীক, আরেকজন বিয়েই করেন  
নি। চা এলো। প্রথম ভদ্রলোক দেখি ঘড়ির কাঁটা  
মাফিক (clockwise), দ্বিতীয়জন তার উল্টো কায়দায়  
(anti-clockwise) আর তৃতীয়জন এলোমেলো  
ভাবে কাপের মধ্যে চামচ নাড়ছেন। কেন ?
- বস্তিরিশ ॥ একটা হাঁসের সামনে দুটো হাঁস, দুটো হাঁসের পেছনে  
একটা হাঁস, আর মধ্যেখানে একটা—কমপক্ষে ক-টা  
হাঁস থাকলে এটা হতে পারে ?
- তেস্তিরিশ ॥ টানলে সাধারণত সব জিনিস হয় বাড়ে, নয় যেমন ছিল  
তেমনি থাকে। টানলে ছোটো হয় কোন জিনিস ?
- চৌতিরিশ ॥ চা-এর কাপের হাতল কোন্ দিকে থাকে ?
- পয়তিরিশ ॥ হাইপো-বোটানিক্যাল গার্ডেনে চড়ুইভাতি। দুটো  
এক চেহারার কাপে সমান পরিমাণ জল রয়েছে।  
একটায় তাপ 4 সেন্টিগ্রেড, অণ্ডটায় 4° ফারেনহাইট।  
একই সঙ্গে একই ওজনের দুটো ডিম একই উচ্চতা থেকে  
দুটো কাপেই ফালা হলো। কোন্ কাপের ডিমটা  
আগে তলায় পড়বে ?
- ছত্তিরিশ ॥ ইংরিজিতে মোট পাঁচটা স্বরবর্ণ : a, e, i, o, u. এদের  
কেউ-না-কেউ না-থাকলে কোনো শব্দ উচ্চারণ করাই  
শক্ত। একই শব্দে এঁদের দু-তিনজনও হাজির থাকেন।  
এমন পাঁচটা শব্দ বলতে পারো যাতে এঁরা পাঁচজনেই  
একবার করে উপস্থিত আছেন ?

সাঁইতিরিশ ॥ কাটলে সাধারণত সব জিনিসই আকারে ছোটো হয়ে যায়, কিন্তু সংখ্যায় বাড়ে। কাটলে আকারে বাড়ে কিন্তু সংখ্যায় কমে না কোন্ জিনিস ?

আটতিরিশ ॥ কলকাতার কোন্ রাস্তায় 120 নম্বর বাস চলে ?

উনচল্লিশ ॥ একটা গোল টিনে 50টা সিগারেট ধরে। এখন টিনের বাসটা যদি বাড়িয়ে দুগুণ করা হয়, কত সিগারেট ধরবে ?

ধাঁধার বই গভম

## উত্তর

### 1. নিম্নের খেলা

কাঠি সরিয়ে সরিয়ে প্রতিপক্ষকে এই অবস্থায় ফেলতে পারলে জিৎ নিশ্চিত।

এক ॥ যদি একটা সারি লোপাট হয়ে গিয়ে মাত্র দুটো সারি পড়ে থাকে, আর দু সারিতেই সমান সংখ্যার ( 5-5, 4-4, 3-3, 2-2, 1-1 ) কাঠি থাকে।

দুই ॥ যদি তিন সারিতে কাঠির অবস্থা এই র'ম হয় : 2,4, 6 ; 1, 4, 5 ; 1, 2, 3 ; 1, 1, 1.

যে-খেলোয়াড় এই অবস্থায় খেলাটাকে নিয়ে আসতে পারবে, তারই জিৎ। দুজনেই যদি এই কৌশল জানে তবে যে প্রথম টানবে সেই জিতবে।

প্রথম খেলোয়াড় প্রথম দফায় কোন্ সারি থেকে ক-টা কাঠি টানবে? যে-কোনো সারি থেকে 1টা। তারপর তো কী করতে হবে বলাই হয়েছে।

অধ্যাপক বুটন খেলাটার 'নিরাপদ' বা 'বিপজ্জনক' অবস্থা বোঝানোর জন্তে দুই-ওয়ারি চিহ্ন ( Binary notation ) ব্যবহার করেছিলেন।

আমরা সাধারণত দশমিক পদ্ধতিতে সংখ্যা লিখি। এর ভিত্তি হলো 10. 1234 মানে  $1 \times 1000 + 2 \times 100 + 3 \times 10 + 4 \times 1$ . অর্থাৎ  $1 \times 10^3 + 2 \times 10^2 + 3 \times 10^1 + 4 \times 10^0$ . 4 আছে এককের ঘরে, 3 দশকের ঘরে, 2 শতকের ঘরে আর 1 সহস্রকের ঘরে।

এখন যদি 10-এর বদলে অন্য কোনো সংখ্যার ভিত্তি ধরি? ধরলুম 2. এই নিয়মে 1234 মানে হবে  $1 \times 2^{10} + 0 \times 2^9 + 0 \times 2^8 + 1 \times 2^7 + 1 \times 2^6 + 0 \times 2^5 + 1 \times 2^4 + 0 \times 2^3 + 0 \times 2^2 + 1 \times 2^1 + 0 \times 2^0$ , সংক্ষেপে 10011010010.

তাহলে চলতি নিয়মের 1, 2, 3, 4 ইত্যাদিকে দুই-ওয়ারি নিয়মে লিখলে

	$2^2$	2	1
1	0	0	1
2	0	1	0
3	0	1	1
4	1	0	0
5	1	0	1
6	1	1	0
7	1	1	1

( দশমিক নিয়মে যেমন চিহ্ন দশটা—  
0, 1, 2, 3, 4, 5, 6, 7, 8, 9.  
দুই-ওয়ারিতে মাত্র দুটো : 0, 1 )

3, 5, 7-কে দুই-ওয়ারি লিখে যোগ করা যাক :

$$\begin{array}{r} 011 \\ 101 \\ 111 \\ \hline 223 \end{array}$$

ঘরগুলোর প্রত্যেক ক-টার যোগফল শূন্য বা জোড় সংখ্যা হলে অবস্থা 'নিরাপদ', না-হলে 'বিপজ্জনক'। খেলার শুরুতেই তা হয়ে রয়েছে।

## 2. ঘোড়ার সঙ্গে ঘোরাঘুরি

ক ॥ রাজপুত্র সামনের ঘাসে আগুন লাগিয়ে দেবে। পেছনের আগুন এসে সেখানেই থেমে যাবে।

খ ॥ 17টা ঘোড়ার সঙ্গে গোপাল তার ঘোড়াটাও জুড়লো। তাহলে 18-এর  $\frac{1}{2}$  হলো 9,  $\frac{1}{3}$  হলো 6,  $\frac{1}{6}$  হলো 2.  
 $9+6+2=17$ .

গ ॥ সন্ন্যাসী দুজনেরই কানে-কানে বলে দিলেন : ঘোড়াছটো পাণ্টে নাও। তুমি ওর ঘোড়ায় চড়ে, ও তোমার ঘোড়ায় চড়ুক।

## 3. জালিয়াতির জ্বালা

ভদ্রলোক (I) তো লাভ করলেন মাস্তুর একশ টাকা। 30

টাকার শাড়ি আর সাতটা কড়কড়ে দশ টাকার নোট। সাবিত্রী বস্ত্রালয় ঐ একশ টাকাই ঠকলো।

#### 4. বইএর পোকা

4002 পাতা

#### 5. নাগাবলি

বন্ধুটি যদি পুরুষজাতীয় হন (স্কটিশ কলেজে পড়লে তা না-হওয়ার কোনো কারণ নেই) তবে বাবার নামের সঙ্গে মিলিয়ে ছেলের নাম হয়েছে সেটা বোঝা কি খুব শক্ত?

#### 6. ছেলের হাতের মোয়া

গজেনকাকু যে দশ পয়সা বলাইকে (বা কানাইকে) দিয়েছিলেন, তাই দিয়ে সে কানাই-এর (বা বলাই-এর) কাছ থেকে একটা মোয়া কিনেচে। এবার কানাই (বা বলাই) সেই পয়সা দিয়ে ভাই-এর কাছ থেকে একটা মোয়া কিনলো। এই করেই একটা দশ পয়সার বদলে দু হাঁড়ি মোয়া বিক্রি হয়ে গ্যাচে।

#### 7. কয়েদীর কেরামতি

সম্ভাবনাগুলো বিচার করে ছাখা যাক।

প্রথম কয়েদী দেখতে পাবে লাল-লাল, কালো-কালো, লাল-কালো, কালো-লাল টুপি। এখন, কালো টুপি মাত্র দুটোই আছে। কালো-কালো দেখতে পেলে সে বলতে পারতো তার মাথার টুপি লাল রঙের। কিন্তু সে নিশ্চয়ই কালো-কালো দেখেনি, তাই বলতে পারলো না। দ্বিতীয় কয়েদী একটাই টুপি দেখতে পাচ্ছে। সেটা হয় লাল, নয় কালো। এর মধ্যে কালো দেখলে তবে সে বলতে পারে তার মাথায় কোন্ রঙের টুপি আছে। তৃতীয় কয়েদী বুঝলো, প্রথম কয়েদী কালো-কালো ছাথে নি, দ্বিতীয় কয়েদীও কালো ছাথে নি, সুতরাং তার টুপির রং নিশ্চয়ই লাল।

#### 8. সত্যাসত্য

ছেলেটা সত্যবাদী বা মিথ্যাবাদী যাই হোক না কেন, প্রশ্নের

উত্তরে সে সর্বদাই 'হ্যাঁ' বলবে। সত্যবাদী হলে সত্যি করে বলবে 'হ্যাঁ', মিথ্যাবাদী হলে মিথ্যে করে বলবে 'হ্যাঁ'। কাজেই গাইড সত্যবাদী; তার পরের কথা 'কিন্তু স্মার ছেলেটা মিথ্যাবাদী'ও তাহলে সত্যি। ছেলেটিই তার মানে মিথ্যাবাদী।

### 9. শহাদ মর্জিকা

ক্যালকুলাস না-করেই উত্তরটা বলা যায়। দুর্ঘটনা ঘটেচে 12 মিনিট পরে। এই 12 মিনিটই মাছিটা উড়েছিল। তার মানে সে উড়েচে 60 মাইল পথ (ঘন্টায় 300 মাইল বেগে উড়লে 12 মিনিটে যতখানি যায়)।

### 10. ছোট্টো কিন্তু বড়ো সমস্যা

এই ভাবে সাজানো যায় :

4	3	5	2
5	2	1	4
1	4	3	5
3	5	2	1

### 11. তুরূপের রং

তুরূপের রং হরতন।

রুইতন ও

চিড়িতনের

সম্পর্ক এই

হরতন দিয়ে

হতে পারে :

হতে পারে :

রু চি

ই

হ

রু

চি

4

1

6

2

4

1

— হরতনের ছোটো তাস। তাই

হরতনই তুরূপের রং।

রু	চি	ই	হ	রু	চি	
3	2	5	3	3	2	} বাতিল, কারণ দু-রঙের তাসের সংখ্যা এক হয়ে যাচ্ছে।
2	3	4	4	2	3	
1	4	3	5	1	4	—বাতিল, কারণ তুরূপের তাস দুটোর বেশি হয়ে যাচ্ছে।

## 12. গয়লার কেরামতি

বালতি তিনটেকে লেখা যাক 8, 5, 3, তাহলে

	8-এ	5-এ	3-এ
	থাকবে	থাকবে	থাকবে
8 থেকে 5-এ ঢাললে	3	5	0
5 „ 3-এ „	3	2	3
3 „ 8-এ „	6	2	0
5 „ 3-এ „	6	0	2
8 „ 5-এ „	1	5	2
5 „ 3-এ „	1	4	3

আরো অনেক কৌশলে ঢালা যায়।

## 13. ভাই-ভাই

যে-কোনো জোড়কে ভাই-ভাই ধরে, বাকি চারজনের মোট বইএর  
দুগুণের সঙ্গে যোগ করলে, সেই সংখ্যা দিয়ে 100,000 ( 1000 টাকা =  
100,000 পয়সা ) বিভাজ্য কিনা দেখতে হবে। যদি হয়, তবে  
সেই জোড়ই ভাই ভাই।

ভাইরা কিনলো	বাকিরা কিনলো	দুগুণ	মোট
$1+2=3$	18	36	39
$1+3=4$	17	34	38
$\left. \begin{matrix} 1+4 \\ 2+3 \end{matrix} \right\} = 5$	16	32	37

$\begin{matrix} 1+5 \\ 2+4 \end{matrix} \}$	$=6$	15	30	36
$\begin{matrix} 1+6 \\ 2+5 \\ 3+4 \end{matrix} \}$	$=7$	14	28	35
$\begin{matrix} 2+6 \\ 3+5 \end{matrix} \}$	$=8$	13	26	34
$\begin{matrix} 3+6 \\ 4+5 \end{matrix} \}$	$=9$	12	24	33
$4+6=10$		11	22	32
$5+6=11$		10	20	31

32-ই হচ্ছে সেই সংখ্যা। তাহলে 4নং আর 6নং অর্থাৎ সম্রাট আর শিশেবাবু জার্তুতো-খুড়তুতো ভাই।

#### 14. ঝাঁঝিপোকাকার কান্না

পাঁচজন খেলেচে, তার মধ্যে দুজন একই রান করেছে। তবে তাদের দুজনেই সবচেয়ে বেশি রান করেছে বলা যাচ্ছে না, কারণ যে-সাতটা জোড়ের রান-সংখ্যা দেয়া হয়েছে তার মধ্যে 115-ই হচ্ছে সবচেয়ে বেশি, আর সেটি বিজোড়। এখন পাঁচজনের মধ্যে যে-কোনো দুজনের (ধরা যাক তিন নম্বর আর চার নম্বর খেলোয়াড়) এক রান ধরলে তাদের কথা পাঁচবার আর বাকি তিনজনের কথা তিনবার করে থাকবে। সাতটা জোড়ের রানের যোগফল তিন দিয়ে বিভাজ্য নয়। কাজেই যারা একই রান করেছে তাদের রানের যোগফলও 3 দিয়ে বিভাজ্য হবে না। বিজোড়গুলো ইতিমধ্যেই বাদ চলে গ্যাচে, জোড়দের মধ্যে পড়ে থাকে 110 আর 112. তাহলে যারা একই রান করেছে তাদের রান 55 অথবা 56. এবার সহজ হিসেবে বেরিয়ে এলো, যে-ওপনার ক্যাচ তুলে আউট হয়েছেন, তিনিই সবচেয়ে বেশি রান করেছেন, 59.



### 15. বাঘা দাবাড়ের কাণ্ড

যমজের দিক দিয়ে সেরা ও ওঁছা খেলোয়াড়ের সম্ভাবনা হতে পারে :

বাবা      ছেলে

বোন      মেয়ে

ছেলে      বাবা

মেয়ে      বোন

বয়েসের দিক দিয়ে হিসেব করলে প্রথম তিনটেই বাতিল।  
সুতরাং মেয়েই সেরা খেলোয়াড়।

### 16. দুধে-জলে

জলের পাত্রে দুধের পরিমাণ আর দুধের পাত্রে জলের পরিমাণ সমান। নিজেই পরীক্ষা করে দেখো। এক সারিতে তেরোটা কালো তাস, আরেক সারিতে তেরোটা লাল তাস সাজাও। ওপরের সারি থেকে য-টা ইচ্ছে তাস তুলে নিচের সারিতে রাখো, আবার নিচের সারি থেকে লাল-কালো মিশিয়ে সেই সংখ্যক তাসই ওপরের সারিতে নিয়ে যাও। দেখাও, দু সারিতে তাসের সংখ্যা সমান হয় কিনা!

### 17. প্রচ্ছন্ন পাটীগণিত

476

956

868

376

248

248

61504

2676 ( আরো অণ্ড উত্তরও সম্ভব )

### 18. বন্দী পতঙ্গ

বন্ধ বোতলের ওজন কিছুটা বেড়ে যাবে। যেটুকু বাড়বে তা হবে মাছির আপাত ভরের সমান।

### 19. ঘনরাম দাসের দিনপঞ্জি থেকে

মায়াপুরীর বয়েস  $x$  আর মহাকালের বয়েস  $y$  ধরলে,  $y=2x$ . তাহলে  $x-1=\frac{3}{5}(2x+1)$  অর্থাৎ  $x=\frac{1}{3}$  অযুত বছর, আর  $y=11$  অযুত বছর। এখন তাহলে শহরটার বয়েস হবে 55475 বছর 8 মাস।

### 20. আপত্তিকর চিঠিপাটি

প্রতি চরণের প্রথম ছুটি অক্ষর ওপর থেকে নিচে পড়লে :  
আপনারা এত বোকা।

বাদিক থেকে প্রতি চরণ ওপর থেকে নিচে, আর ডান দিক থেকে, নিচ থেকে ওপরে পড়লে : ধাঁধা কবে এক হবে।

$n$ -সংখ্যক চরণের  $n$ -সংখ্যক অক্ষর, অর্থাৎ প্রথম চরণের প্রথম, দ্বিতীয় চরণের দ্বিতীয়, ... ইত্যাদি পড়ে চললে : ধাঁধা সম্পাদকের মুণ্ডু চাই। শেষ চরণের গুপ্তনাম : সমর ধাড়া।

### 21. বাটপাড়িয়া হত্যারহস্য

1. ইন্কা-রা পেরুর অধিবাসী ছিল, মেক্সিকোর অধিবাসীদের নাম অ্যাজটেক।

2. কিপু হলো স্মৃতির ফাঁস, কাগজের সঙ্গে তার কোনো সম্পর্ক নেই।

3. ছ নম্বর মুশকিলের পর চার নম্বর এসে গ্যাচে।

4. কিপু পড়ানোর জন্তে কিউবার কনসুলেটে যাওয়া অর্থহীন।

5. বাটপাড়িয়াকে ব্যাপারিয়া বলা হয়েছে।

6. 227187-এর সংখ্যামূল 9 ( $2+2+7+1+8+7=27$ ,  $2+7=9$ ), 4 নয়।

7. টিকেকাশি নিজেই বলেছেন, আরশোলাটা মাটির, স্মৃতির টিকটিকিতে খাওয়ার প্রশ্নই ওঠে না।

8. প্রথমে বলা হয়েছে বাটপাড়িয়া গুলিবিদ্ধ হয়েছেন, টিকে-কাশি বলছেন চাকরটি বুকে ছুরি মেরেছে।

9. টিকেকাশি চারজনের কথা বলেছেন, অর্থাৎ বাকি দুজন সম্পর্কে তাঁর প্রশ্ন।

10. একবার ইনকাম ট্যাক্স অফিসার আরেকবার ইন্সপেক্টর বলা হয়েছে।

11. পুলিশ কমিশনারের নাম একবার মিস্টার দাশগুপ্ত আরেকবার সেনগুপ্ত বলা হয়েছে।

12. দৌলতবাবুকে গৌরববাবু বলা হয়েছে।

13. দৌলতবাবুকে প্রথমে নিরঙ্কর বলা হয়েছে, তারপব তিনিই 227187 লিখেছেন।

## 22. যাদুবর্গ ও বিযাদুবর্গ

পাঁচঘরের যাদুবর্গের যোগফল হবে 65, ছ ঘরের 111. সাধারণ সূত্র হল  $\frac{n^3+n}{2}$ , যেখানে  $n$  মানে একটা সারিতে যতগুলো ঘর আছে তার সংখ্যা।

যে-কোনো তিনটি  $a, b, c$ , সংখ্যা দিয়ে তিন ঘরের যাদুবর্গ সাজানোর সাধারণ সূত্র :

$a-b$	$a-c$	$a+b+c$
$a+2b+c$	$a$	$a-2b-c$
$a-b-c$	$a+c$	$a+b$

2 থেকে 10 অবধি সংখ্যা নিয়ে যাদুবর্গ সাজাতে হলে  $a$  হবে এদের মধ্যের সংখ্যা, অর্থাৎ 6. যে-কোনো ক্ষেত্রেই  $b$  ও  $c$  হবে 1 ও 2. তাহলে যাদুবর্গটি হবে :

5	4	9
10	6	2
3	8	7

5 থেকে 13 দিয়ে করলে হবে :

8	7	12
13	9	5
6	11	10

একটি বিযাদুবর্গের নমুনা :


2	3	4
5	1	7
9	6	8

IBM 1130 কম্পিউটারে 2 আর 1-কে যথাস্থানে রেখে 365টি বিযাদুবর্গ পাওয়া গ্যাচে। পাঠক নিশ্চয়ই অমুমান করতে পারো, বিযাদুবর্গ তাহলে কত রকমের হতে পারে।

23. পায়ে ধরে সাধা..

বর্গক্ষেত্রটির বাহু  $x$  ধরলে APB ত্রিভুজটির ক্ষেত্রফল  $\frac{x^2}{2}$  দাঁড়াবে। হুণ্ডণ করলে  $xy$ , একে  $x$  দিয়ে ভাগ করে বর্গ করলে  $x$ -এর হিসেবে  $y^2$ -এর মান পাওয়া যায়। ঠিক এই ভাবে  $x$ -এর হিসেবে  $y^2$ —১

$z^2$ -এর মানও পাওয়া যাবে। তাহলে  $y^2 + z^2 = 3^2$ , হলে  $x^4 - 20x^2 + 37 = 0$



তাহলে  $x^2 = 10 + \sqrt{63} = 17.937254$  বর্গমিটার। তাহলে যে জমিতে গুপ্তধন আছে তার ক্ষেত্রফল তা-ই হবে। তার মানে জমিটির দৈর্ঘ্য 4.12 থেকে 4.24 মিটারের মধ্যে।

মৃত্যুঞ্জয় এই হিসেব করেই গ্রামের সেই জমিটা বেছে নিলো যার দৈর্ঘ্য 4.12 থেকে 4.24 মিটারের মধ্যে।

$x$ -এর মান ঋণাত্মক ধরলে সে-জমির ক্ষেত্রফল দাঁড়াবে 2.062746 বর্গমিটার। মৃত্যুঞ্জয় আর শুদিকে নজর দেয় নি, কারণ গুপ্তধন তাহলে জমির বাইরে পুঁতে হইত।

## 24. দস্তুরমতো দরদস্তুর

$x$  টাকায় শ হলে 30 টাকায়  $\frac{3000}{x}$  টা ডিম পাওয়া যায়। শ-এ 1 টাকা কমলে 30 টাকায়  $\frac{3000}{x-1}$  টা ডিম পাওয়া যাবে।

তাহলে  $3000\left(\frac{1}{x} - \frac{1}{x-1}\right) = 5$ , কাজেই ডিমের শ 24 টাকা।

## 25. খল্লট অ্যাভিনিউ-এর ডাকপিয়ন

12 নম্বর বাড়ির সামনে দাঁড়ালে পিয়ন  $2+4+6+8+10=14+16$  এই অভেদটি পাচ্ছে। অর্থাৎ বাঁদিকে 2, 4, ..., 2r আর

ডানদিকে  $2(r+2), \dots, 2(r+k)$  এই ছুএর যোগফল সমান হচে  $(2r+2)$  নম্বর বাড়ির সামনে দাঁড়ালে। তাহলে

$$r^2 + r = 2r(k-1) + (k-1)(k+2)$$

$$\text{বা } r = \frac{2k-3 + \sqrt{(3-2k)^2 + 4(k-1)(k+2)}}{2}$$

$k=3, 15$  এবং  $85$  ধরলে  $\sqrt{(3-2k)^2 + 4(k-1)(k+2)}$  পূর্ণবর্গ হয়। তাহলে  $r$  হবে  $5, 34, 203$ , সুতরাং  $(2r+2)$  নম্বর বাড়ি হবে  $12, 70$  আর তার পরেই  $408$ . তার মানে  $2+4+6+\dots+406=410+412+\dots+576$ . অর্থাৎ বাঁ ফুটপাথে মোট  $288$ টা বাড়ি ছিল।


বিজোড়ের বেলায় :  $(2r+1)$  নম্বর বাড়ির সামনে দাঁড়িয়ে যদি ডানদিকের  $k$ -সংখ্যক বাড়ির সঙ্গে  $1+3+5+\dots+2r-1$ -এর যোগফল সমান হয়, তাহলে  $r^2 - 2rk - k(k+2) = 0$ , অর্থাৎ  $r = k + \sqrt{2k^2 + 2k}$ .  $\sqrt{2k^2 + 2k}$  পূর্ণবর্গ হবে  $k$ -র মান  $1, 8$  বা  $49$  হলে। সুতরাং প্রিয়ন যদি  $7, 41$  আর  $239$  নম্বর বাড়ির সামনে দাঁড়ান, তবে বাঁ হাত-ডান হাতের যোগ মেলাতে পারবেন।

## 26. দুঃসাহসিক ভ্রমণকাহিনী

ছুটো প্রশ্নের মধ্যে সময় লেগেচে  $1$  ঘণ্টা, আর পথ  $1300$  গজ। তাহলে পুরো পথটা তার ছুগুণ, মানে  $2600$  গজ।

## 27. জন্মদিনের কেক

চারটে সোজাশুজি কোপে একটা গোল কেককে এগারোটা টুকরো করা যাবে।  $n$ -সংখ্যক কোপে  $\frac{n^2+n+2}{2}$  টি টুকরো পাওয়া যাবে।



## 28. হবুচন্দ্র রাজার গোলটেবিল

হবুচন্দ্র রাজার হাতে  $x$ -সংখ্যক প্রস্তাব আর বৈঠকীদের সংখ্যা  $y$  হলে সবচেয়ে কম প্রস্তাবকের প্রস্তাবসংখ্যা  $x-y+1$  হবে। কাজেই প্রস্তাব চালাচালিতে সবচেয়ে আগে এঁর কাজ ফুরোবে। ইনি শেষ বারের মতো রাজার হাতে তুলে দেবেন  $y(x-y+1)$  গুলো প্রস্তাব। রাজার হাতে পড়ে ছিল  $x-(x-y+1)=y-1$  টা প্রস্তাব। তাহলে রাজার হাতে মোট প্রস্তাব ছিল  $y-1+y(x-y+1)$  গুলো। হবুচন্দ্র মন্ত্রীর হাতে  $y-2$ টা প্রস্তাব থাকবে। তাহলে,  $y-1+y(x-y+1)=4(y-2)$ . অর্থাৎ  $\frac{7}{y}=2-x+y$ .

যেহেতু প্রস্তাব এবং বৈঠকীদের সংখ্যা ভগ্নাংশ হতে পারে না, তাই  $y=7$  হবেই। অতএব  $x=8$ . কাজেই মোট প্রস্তাব  $8+7+6+5+4+3+2=35$  টা।

## 29. বিভাজ্যতা

873873 কেন? এখানেও চাবিকাঠি হলো 1001, কারণ  $7 \times 11 \times 13 = 1001$ . আর তিন অংকের কোনো সংখ্যাকে 1001 দিয়ে গুণ করা মানে সংখ্যাটিকে একবার লিখে আবার লেখা:  $873 \times 1001 = 873, 873$ . তেমনি 567343 এই সংখ্যাটি 7 দিয়ে বিভাজ্য কিনা বুঝতে হলে 567567 থেকে সংখ্যাটি বিয়োগ করো। বিয়োগফল 7 দিয়ে বিভাজ্য, সুতরাং 567343-ও 7 দিয়ে বিভাজ্য হবে। 11 আর 13-র বেলাতেও এ-নিয়ম খাটবে।

না-লিখলেও বোঝা যাচ্ছিল, এখানেও একটা নিয়ম খাটাতে হবে। নিয়মটা হলো: দুটি সংখ্যা যদি কোনো সংখ্যা দিয়ে বিভাজ্য হয় তবে তাদের যোগফল বা বিয়োগফলও সেই সংখ্যা দিয়ে বিভাজ্য হবে। সংখ্যাটি abcde হলে ব্যাপারটা হলো  $10000a+1000b+100c+10d+e$ .  $a-b+c-d+e$ , 11 দিয়ে বিভাজ্য হোক

আর না হোক, এদের বিয়োগফল অর্থাৎ  $9999a+10001b+99c+11d$ , 11 দিয়ে বিভাজ্য হবেই। আর যদি  $a-b+c-d+e$ , 11 দিয়ে বিভাজ্য হয় তবে সূত্রটি কাজে লাগালে  $abcde$  অর্থাৎ  $10000a+1000b+100c+10d+e$ -ও 11 দিয়ে বিভাজ্য।  $111111111000$  সংখ্যাটি 72 দিয়ে বিভাজ্য।

### 30. উড়নচণ্ডীতলা হাউসিং এস্টেট

ত্রিকোণ ছোটোর ছোটো বাহুটা হবে এক মাইলের  $\frac{1}{2}$  ভাগ, তাহলে রাস্তাটা হবে সেই ত্রিভুজের সবচেয়ে বড়ো বাহুটা। সেটা হবে পৌনে এক মাইলের  $\frac{1}{2}$  ভাগ। তাহলে দাঁড়ালো 1430 গজ।

### 31. বাজার করার হাজার ঠালা

একটা কমলানেবুর দাম  $x$  আনা  $y$  পাই ( $=12x+y$  পাই) হলে একটা আপেলের দাম হবে  $y$  আনা  $x$  পাই (অর্থাৎ  $12y+x$  পাই)। কমলালেবুর সংখ্যা  $1000a+100b+10c+d$  হলে আপেলের সংখ্যা হবে  $100b+10c+d$ ।

তাহলে  $(1000a+100b+10c+d)(12x+y)=(12y+x)(100b+10c+d)$ । একে লেখা যায়  $1000a(12x+y)=11(y-x)(100b+10c+d)$ । বাঁদিকের গুণফলের শেষের তিনটে সংখ্যা শূন্য, কাজেই  $c=d=0$ , আর  $b$  কখনোই শূন্য নয়।

$$\text{তার মানে } 10a(12x+y)=11b(y-x)$$

$y$ -এর থেকে  $x$  ছোটো,  $12x+y$ -এর একটা উৎপাদক 11; তাহলে  $x$  আর  $y$ -এর মান হতে পারে : (1, 10), (2, 9), (3, 8), (4, 7), (5, 6)।

$y$  থেকে  $x$  বিয়োগ করলে সব সময় বিজোড় হচ্ছে, কাজেই  $b$ -এর মান হবে জোড় আর  $y-x$  হবে 5. তাহলে  $x=3$ ,  $y=8$ . তাহলে  $b=8a$ , কাজেই  $a=1$ ,  $b=8$ .



সুতরাং কমলানেবুর সংখ্যা 1800 আর একটা কমলানেবুর দাম 3 আনা 8 পাই।

### 32. টোপোলজি

আর্যাবর্তের ক্ষেত্রে :

সিমলা > দিল্লী > শ্রীনগর > দ্বারকা > দিল্লী > বারাণসী > কলকাতা > আগ্রা > দিল্লী > কলকাতা। কলকাতা থেকেও যাত্রা শুরু করে সিমলায় শেষ করতে পারো। ( আরো অগ্রভাবেও করা যায়। )

দাক্ষিণাত্যের ক্ষেত্রে পারা যাবে না।

### 33. পৃথিবীর সূত্রবলয়

ব্যবধান হবে  $\frac{36}{2\pi}$  ইঞ্চি (1 গজ = 3 ফুট = 36 ইঞ্চি)।  $\pi$ -এর মান 3.14 ধরলে ব্যবধান দাঁড়ায় 5.7 ইঞ্চি ( প্রায় )!

### 34. নোস্তার বুদ্ধি

একটা ইন্টার ওজন  $x$  ধরলে  $x = (\frac{3x}{4} + \frac{3}{8}) = \frac{3}{2}$  কে.জি। তাহলে 18টা ইন্টার ওজন 27 কে.জি, আর 8টার ওজন 12 কে.জি। সুতরাং নোস্তার ওজন  $\sqrt{27 \times 12}$  কে.জি = 18 কে.জি।


### 35. হ য ব র ল-র বিচারসভা

খরগোশ 5 পা গেলে আসামীর থেকে তার নিজের পায়ের মাপে  $5 - \frac{2 \times 8}{8} = \frac{1}{8}$  পা দূরত্ব কমিয়ে ফ্যালে। কাজেই 27 পা দূরত্ব কমাতে তাকে 75 পা ছুটতে হবে। সুতরাং খরগোশ সত্যি বলচে — এটা অসম্ভব কিছু নয়।

### 36. স্বল্পতম দূরত্ব

সবচেয়ে সোজা পথ হলো আলোর পথে চলা। A থেকে নদীর দূরত্বসূচক রেখাটা 3 গজ বাড়িয়ে দিলে যে-বিন্দুটা (D)


পাওয়া যায়, তার সঙ্গে B যোগ করলে নদীর রেখা (A'B')-এর C



বিন্দুতে ছেদ করবে। ঐ C বিন্দু থেকে জল তুলে ছুটলেই স্বল্পতম দূরত্ব পাওয়া যায়। দূরত্ব হবে :  $\sqrt{9^2 + 4^2} = \sqrt{81 + 16} = \sqrt{97}$  গজ  $= 9.32$  গজ।

### 37. পাঁচে বহুতল ছয়ে গ্রহ

ছবিতে যেমন দ্যাখানো আছে সেইভাবে কাগজটা সোজাসুজি দুটো সমান ভাবে ভাগ করো। তারপর D কোণকে ভাঁজ করে A B-র ওপর ফ্যালো। এবার DBC ত্রিভুজটা কেটে বার করে নাও। এই ত্রিভুজটাকে এবার চারটে সমবাহু ত্রিভুজে ভাগ করে, মধ্যের ত্রিভুজটা ভিৎ করে অন্য তিনটি ত্রিভুজের শীর্ষগুলো এক করে জুড়ে দাও—সুন্দর পিরামিড পেয়ে যাবে।






কাগজের ফালিটাতে কমপক্ষে সাতটা বর্গক্ষেত্রে ভাগ করতে

হবে। তারপর ছবিতে যেমন দ্যাখানো আছে তেমনি ভাবে কাগজটা ভাঁজ করে চলো—দুবিল্য লুডোর ছক্কা তৈরি হবে। শেষটা আঠা বা সেলোট্যেপ দিয়ে জুড়ে নিও।



a



### 38. কাটাকুটি

প্রথম পাঁচটা চাল 15120 রকমে দেয়া যায়, কারণ ন-টা ঘরের মধ্যে যে-কোন পাঁচটা ঘরে মোট  $9 \times 8 \times 7 \times 6 \times 5 = 15120$  রকমে চাল দেয়ার সম্ভাবনা থাকে।

প্রথম যে দাগ মারবে তারই জেতার সম্ভাবনা বেশি। সূত্রটা :

$$\frac{\binom{n}{k+2} - \binom{n}{k}}{2}, \text{ n মাত্রার সংখ্যা, k যে-কোনো দিকের ঘরের সংখ্যা।}$$

### 39. বাসাবদল


এই কায়দায় সরাও : 3-6-5-3-1-4-3-5  
6-1-5-3-4-5-1-6-3.

#### 40. একটি খুচরো সমস্যা

বাঁদিক থেকে পাঁচটা মুদ্রার নম্বর দেয়া যাক : 1, 2, 3, 4, 5. এবার জোড়ায়-জোড়ায় সরাও। 4-5, 1, 2, 3 ; 2-3, 4, 5, 1 ; 4-5, 2, 3, 0-0, 1 (0 দিয়ে ফাঁক বোঝানো হচ্ছে) ; 4, 0-0, 3, 5-2, 1 ; 4, 2-1, 3, 5. কমপক্ষে পাঁচ চাল লাগবেই।

মুদ্রার সংখ্যা যদি দুটো করে বাড়িয়ে চলা হয়, তবে সাধারণ সূত্রটি হবে :  $N = \frac{n(3n-1)}{2}$ ,  $N$  হলো চালের সংখ্যা, আর  $n$  জোড়ের সংখ্যা।

#### 41. ঘড়ি ভাগ




রোমান অংকে লেখা না-হলে আর কোনোভাবে এই চার ভাগ করা যায় না।

#### 42. গ্রাখার ভুল

দেখতে না পেলে উত্তর দিয়ে কী হবে ?



## 43. রাজার খেলা দাবা



আরো অন্য ভাবেও মন্ত্রী বসানো সম্ভব।

## 44. টোপোলজির খেলা

দাগবরাবর কাটলে দ্বিতীয়টা থেকে একটা, আর তৃতীয়টা থেকে দুটো বাংলার চার অর্থাৎ ভারত-আরবি ৪ পাবে।




## 45. তাসের দেশ

বাকি তাস হলো : চিড়িতনের ছয়, হরতন ও ইস্কাপনের সাত, হরতন, ইস্কাপন ও চিড়িতনের আট।

## 46. ব্রহ্মপুত্রের সমস্যা

বাঁদিকের সারির ওপরের বিন্দুটি থেকে তীরচিহ্ন ধরে পেন্সিল চালিয়ে যাও, দেখবে ন-টা বিন্দুই জোড়া হয়ে গ্যাচে। প্রথম রেখাছুটি বাড়িয়ে না-দিলে অবশ্য কিছুতেই ন-টা বিন্দু ফরমাসমতো জোড়া যাবে না।




## 47. ঘরে বাইরে

তুটো গেলাসের জোড়ের মুখে যে-ফাঁকটুকু আছে, সেখানে জোরসে একটা ফুঁ দাও। বাস, পিস্টনের কাজ হবে, ভেতরের গেলাসটা বেরিয়ে আসবে।

## 48. হাতিগলা ফাঁক

কাগজটা দু ভাঁজ করে ওপরে ও নিচে (শেষ প্রান্তটুকু বাদ দিয়ে) যে-ভাবে দাগ দেয়া আছে তেমনি লম্বালম্বি কেটে ফ্যালো। এবার  $\leftarrow \rightarrow$  দাগ মারা অংশটাও সোজাসুজি কেটে দাও। এবার ভাঁজটা খুলে রাখো হাতিগলা ফাঁক পাও কিনা।



## 49. লীলাময়বাবুর লীলাখেলা


$$24 = L4 [ 4 = L4 \times 3 \times 2 \times 1 ]$$

$$I \times V = V$$

$$11 = 11^1$$

## 50. ভুতুড়ে গের্ট

ছবিতে যেমন ছাখানো আছে সেইভাবে রুমালটা ধরো। এবার হাত দুটো কনুই থেকে সোজা করার চেষ্টা করো। দেখবে একটা গের্ট পড়ে গ্যাচে।



## 51. সাংখ্যদর্শন

ছোটোর যোগফলই এক হবে।

$$\frac{9+9}{\cdot 9} = 20$$

ছোটো 4 দিয়ে 64 লেখার সহজ উপায়  $\sqrt{\sqrt{4^4}}$  আরেকটা উপায় হলো  $4!! \times 4!!$ . দ্বি-ফ্যাক্টোরিয়াল চিহ্নটি কিছুটা উদ্ভট কিন্তু চালু।  $2n!!$  মানে  $2 \times 4 \times 6 \times \dots \times 2n$ , অর্থাৎ 2 থেকে  $n$ টি পর্যন্ত জোড় সংখ্যার গুণফল। ফলে  $4!! = 2 \times 4 = 8$ . আরো একটা মজার সমাধান হলো  $74$  (হাতে লিখলে আরো পষ্ট হয়)।

$$\frac{2 \div 2}{\cdot 2} + 2 = 7$$

$$\left\{ (\sqrt{2 \div \cdot 2}) \div \cdot 2 \right\} + 2 = 17, \frac{2+2-\cdot 2}{\cdot 2} = 19$$

আবার  $19 = \frac{x+x-1}{x}$  ( 1 থেকে 9 অবধি যে-কোনো সংখ্যা চারবার ব্যবহার হবে 19 লেখার সাধারণ সূত্র )

চারটে 2 দিয়ে বৃহত্তম সংখ্যা :  $2^{2^2}$

এক    ॥    $(1+1+1)+1$

দুই     ॥    $2\sqrt{2}$

তিন    ॥    $3^3-3$

চার    ॥    $5!+5$

পাঁচ    ॥    $666+6 \times 66 \quad 66+6 \times 6$

ছয়     ॥    $777-77$

সাত     ॥    $\sqrt{8 \div 8}$

আট    ॥   155 অংকের

নয়     ॥   20টা

দশ      ॥   248টা

এগাবো ॥   64, চাব ভাগ—9, 15, 4, 36

বারো  ॥   7225. শেষে 5-গুলি যে-কোনো সংখ্যাব বর্গ করতে হলে আগে ডান দিকে 25 লিখে ওপরের রাশিব সঙ্গে 1 যোগ করো। তারপর তলার বাঁদিকের রাশি দিয়ে গুণ করে গুণফলটা 25-এর বাঁদিকে বসিয়ে দাও। অর্থাৎ 25 লিখে,  $8+1=9$ ,  $9 \times 8=72$ , তারপর 7225.

তেরো   ॥   20-ব  $\frac{1}{4}$  যদি 6 হয় তবে হিসেবটা নিশ্চয়ই দ্বাদশমিক বা duodecimal ভিত্তিতে, 10-এর বদলে এখানে ভিত্তি হলো 12. তাহলে 10-এর  $\frac{1}{3}$  হবে 4, যেহেতু  $10_{12}=12_{10}$ .

চোদ্দো  ॥    $79+5\frac{1}{3}=84\frac{1}{3}=84+\frac{2}{3}$ . ভগ্নাংশ ব্যবহার না করলে এর কোনো সমাধান নেই।



পনেরো ॥  $1+2+3+4+5+6+7+8+9=45$

$1+2+3+4+56+7+8+9=90$

$1+23+4+5+6+7+89=135$

$1+2+34+56+78+9=180$

$123+4+5+6+78+9=225$

$123+45+6+7+89=270$

$1+234+56+7+8+9=315$  ইত্যাদি।

ষোলো ॥  $30384^2=923187456$

সত্তেরো ॥  $1\cdot234+98\cdot765=100$

আঠারো ॥  $\frac{5}{8}+\frac{148}{8}=1$

উনিশ ॥  $\cdot01234+\cdot98765=1$

কুড়ি ॥ 18, 36, 54, 72, 90

6-এর পরেই আদর্শ সংখ্যা হলো 28.

একুশ ॥  $\frac{57429}{6381}=9$

বাইশ ॥ 9, 81, 324, 576

তেইশ ॥  $11+1+1+1=14$

চব্বিশ ॥ 2519

চারটে 7 দিয়ে 100 লেখার উপায়  $\frac{7}{7} \times \frac{7}{7}$  ( 1 থেকে 9 অবধি

পূর্ণ সংখ্যা দিয়ে 100 লেখার সাধারণ সূত্র :  $\frac{x}{x} \times \frac{x}{x}$  )

পঁচিশ ॥ 48-এর পরেই অন্তত সংখ্যা হবে 1680.

$1680+1=1681=41^2$ ,  $\frac{1680}{2}+1=841=29^2$

তার ঠিক পরে 57120.

ছাব্বিশ ॥  $1+2+3+4+5+6+7+8 \times 9=100$

$(1+2-3-4)(5-6-7-8-9)=100$

52. ধাঁধালি

এক ॥ এক ঘণ্টা

- দুই ॥ ওরা যমজ নয়, এক সঙ্গে তিন, চার বা পাঁচ ভাই  
জন্মেচে।
- তিন ॥ দেশলাইএর কাঠিটা।
- চার ॥ 'ভুল' এই কথাটা।
- পাঁচ ॥ 9999. আরে, বারো হাজার বারো শ বারো কি আর  
লেখা যায়? বড়ো জোর লিখতে পারো 13212.
- ছয় ॥ ফেব্রুয়ারি বাদে বাকি এগারোটা মাসেই তিরিশটা  
দিন আছে।
- সাত ॥ স্নো সাইকেল রেস।
- আট ॥ জমির আল।
- নয় ॥ 103
- দশ ॥ আদ্বৈকের দু গুণ।
- এগারো ॥ নিজের টেলিফোন নম্বর, মানে যে-টেলিফোনে ডায়াল  
করচি সেই নম্বরটাই।
- বারো ॥ তেরোটাই। মরা মাছগুলো যাবে কোথায়?
- তেরো ॥ বাবর হুমায়ূনের বাবার নাম।
- চোদ্দো ॥ 1'25 টাকা (খনফুটের হিসেব তো)।
- পনেরো ॥ ঐ তিন সেকেন্ডেই।
- ষোলো ॥ মানচিত্র।
- সতেরো ॥ বাড়ির নম্বর প্লেট। সংখ্যা পিছু দাম, তাই 1-এর  
দাম কুড়ি পয়সা হলে, 22 চল্লিশ পয়সা আর 223  
ষাট পয়সা।
- আঠারো ॥ ভাসানের পর দুর্গাপ্রতিমা ফের ঘাটে তুলে আনলে  
সিংহের পলেশুৱা রোদে-জলে খসে যায়, ভেতরের  
খড় বোরিয়ে পড়ে। তখন ষাঁড়ে সিংহ খায়।
- উনিশ ॥ একবার। কারণ, তারপর তো আর 25 থেকে  
বাদ দেবে না, দেবে 24, 23 ইত্যাদি থেকে।
- কুড়ি ॥ দ্বিতীয় ঘড়িটা। দিনে অন্তত দুবার তো ঠিক  
সময় দেবে।

- একুশ ॥ আঠারোটা ।
- বাইশ ॥ ন-টাই ।
- তেইশ ॥ অমাবস্যা তিথি বটে, কিন্তু দিনের বেলা বেরোলে  
তো ড্রাইভার লোকটাকে দেখতে পাবেই ।
- চব্বিশ ॥ ডিলাক সিং ছোট্টে ঘণ্টায় 12 মাইল মতো বেগে আর  
রিলাক সিং ঘণ্টায় 5·17 মাইল । কাজেই—।
- পঁচিশ ॥ তত (অর্থাৎ ৩৩, তেস্তিরিশ) পাখি রইল ( লিলি=৯৯,  
নিরানব্বই, ডড=৬৬, ছেষটি ) ।
- ছাব্বিশ ॥ আদ্বৈকটা । তারপর আর চুকবে না, বেরোতে  
থাকবে ।
- সাতাশ ॥ তিন আঙুল তফাৎ ।
- আটাশ ॥ দ্বিতীয়টা । একটু হিসেব করে ছাখো ।
- উনতিরিশ ॥ দু জনেই সমান লোক গুনবে ।
- তিরিশ ॥ বাড়িমুখো হাঁটা দেবে ।
- একতিরিশ ॥ চিনিটা চায়ের সঙ্গে গুলে নেয়ার জন্তে, আবার  
কেন ।
- বস্তিরিশ ॥ অস্তুত তিনটে ।
- তেস্তিরিশ ॥ বিড়ি, সিগারেট, চুরুট ।
- টোতিরিশ ॥ বাইরের দিকে ।
- পঁয়তিরিশ ॥ 4° ফারেনহাইটে কাপের জল তো বরফ হয়ে  
যাবে, কাজে-কাজেই—।
- ছত্তিরিশ ॥ EDUCATION, SUBORDINATE,  
FAVOURITE, AUTHORIZE, PRE-  
CARIOUS ইত্যাদি ।
- সাঁইতিরিশ ॥ পুকুর ।
- আটতিরিশ ॥ L5 (  $L5 = 5 \times 4 \times 3 \times 2 \times 1 = 120$  )
- উনচল্লিশ ॥ দুশ সিগারেট ধরবে ।

## বকের আত্মহত্যা

বুঝতেই পারছ, ছাপার ভুল। এ-বইতেও কয়েকটা রয়ে গ্যাছে। শুধরে নিও।

পাতা	ধাঁধা	লাইন	আছে	হবে
9	1	11	হাতাসাফাই	হাতসাফাই
24	18	3	বোতলগুলোর	বোতলগুলোয়
30	21	3	‘ত্রুটি’	‘ত্রুটি’
51	36	1	সরলরেখার	সরলরেখায়
55	37	1	বাহুতলই	বহুতলই
65	47	2	চুকিয়ে	চুকিয়ে
88	22	1	পাচ	পাঁচ
91	25	5	$\sqrt{(3-2k)2}\dots$	$\sqrt{(3-2k)^2}\dots$

89 পাতার 5 থেকে 13 দিয়ে তৈরি যাদুবর্গটি হবে

8	7	12
13	9	5
6	11	10

বকের আত্মহত্যা-য় ভুলটা কোথায়? ওটা হবে ‘যুবকের আত্মহত্যা’।